

宋文鑑

和/6
339
5



宋文鑑卷第二十一

詩

七言古詩

禁直

滄浪亭

希真堂東手種菊花十月始開

哭梅聖俞

和賈相公覽杜工部北征篇

白鵲圖

送葛都官南歸

和吳冲卿元會

論學

漁翁

朱雲

楊億

歐陽修

歐陽修

宋祁

梅堯臣

梅堯臣

梅堯臣

孫復

劉敞

劉敞

所錢夫
有拘那

宋文鑑卷第二十一

一

利
292
个

宋文鑑卷第二十一

道傍田家

虎圖

張良

寄贈胡先生

贈陳景回

和渙之深秋月夜書事

雨

有寶復者世居鎮戎能道邊事

大孤山

通判國博命賦假山

與子由別於鄭州西門之外馬上賦詩一篇寄之

送安敦秀才失解西歸

送劉道原歸觀南康

司馬光

王安石

王安石

王安石

蘇洵

狄遵度

狄遵度

王陶

黃庶

陳襄

蘇軾

蘇軾

蘇軾

和錢安道寄惠建茶

韓幹馬十四匹

贈寫御容妙善師

定惠院寓居月夜偶出

豆粥

答西掖諸公見和

號國夫人夜游圖

郭熙畫秋山平遠

任氏閱世堂前大檜

韓信二首

杜子美浣花醉歸圖

送范德孺知慶州

送謝公定作竟陵主簿

過東平侯趙景珍墓

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

黃庭堅

黃庭堅

黃庭堅

黃庭堅

黃庭堅

武昌松風閣

黃庭堅

書磨崖碑後

黃庭堅

滄州亭懷古

沈遼

縱步湘西

張舜民

寒夜

張耒

謁客

張耒

有感

張耒

北鄰賣餅兒

張耒

奉先寺

張耒

美哉

張耒

紫駟馬

許彥國

墨染絲

郭祥正

浯溪

潘大臨

豫章別李元中宣德

謝逸

聞徐師川自京師還豫章

謝逸

早春偶題

崔鷗

阻風雨封家市

李彭

夢訪友生

李彭

禁直

楊億

鳳樓鴛瓦蟾波溼眾籟聲沈百蟲蟄仙盤雲表露成霜何人夜半
牛衣泣芝泥香熟封詔書河漢西傾移斗車陰風撼撼起庭樹寒
澌戛戛鳴宮渠千廬迭唱傳宵警海山鰲背蓬壺頂金釭珠網結
綺錢玉井銀床垂素綆前席受釐詢碩生觀書百斤須中程投籤
乍應嚴彭節求衣誤聽蒼蠅聲渴烏漏盡繁星曙魚鑰建章開萬
戶初日曛隴豔屋梁鳴鞭一聲下天路

滄浪亭

歐陽修

子美寄我滄浪吟邀我共作滄浪篇滄浪有景不可到使我東望
心悠然荒灣野水氣象古高林翠阜相回環新篁抽笋添夏影老

枿亂發爭春妍水禽閒暇事高格山鳥日夕相啾喧不知此地幾
興廢仰視喬木皆蒼煙堪嗟人迹到不遠雖有來路曾無緣窮奇
極怪誰似子搜索幽隱探神仙初尋一徑入蒙密豁見異境無窮
邊風高月白最宜夜一片瑩淨鋪瓊田清光不辨水與月但見空
碧涵漪漣清風明月本無價可惜祇賣四萬錢又疑此境天乞與
壯士憔悴天應憐鴟夷古亦有獨往江湖波濤渺翻天崎嶇世路
欲脫去反以身試蛟龍淵豈如扁舟任飄瓦紅蕖綠浪搖醉眠丈
夫身在豈長弃新詩美酒聊窮年雖然不許俗客到莫惜佳句人
閒傳

希真堂東手種菊花十月始開

歐陽修

當春種花唯恐遲我獨種菊君勿謂春枝滿園爛張錦風雨須與
落顛倒看多易厭情不專鬪紫誇紅隨俗好豁然高秋天地肅百
物衰陵誰暇弔君看金蕖正芬敷曉日浮霜相照耀煌煌正色秀
可飡藹藹清香寒愈峭高人避喧守幽獨淑女靜容羞窈窕方當

搖落看轉佳慰我寂寥何以報時攜一罇相就飲如得貧交論久
要我從多難壯心衰迹與世人殊靜躁種花不種兒女花老大安
能逐年少

哭梅聖俞

歐陽修

昔逢詩老伊水頭青衫白馬渡伊流灘聲八節響石樓坐中辭氣
凌清秋一飲百盞不言休酒酣思逸語更道河南丞相稱賢侯後
車日載枚與鄒我年最少力方優明珠白璧相報投詩成希深擁
鼻謳師魯卷舌藏戈矛三十年閒如轉眸屈指十九歸山邱凋零
所餘身百憂晚登玉墀侍珠旒詩老齏鹽太學愁乖離會合謂無
由此會天幸非人謀頷鬚已白齒根浮子年加我貌則不歡猶可
強閒屢偷不覺歲月成淹留文章落筆動九州釜餽過午無饋餽
良時易失不早收篋櫝瓦礫遺琳璆薦賢轉石古所尤此事有職
非吾羞命也難知理莫求名聲赫赫掩諸幽翩然素旒歸一舟送
子有淚流如溝

和賈相公覽杜工部北征篇

宋 祁

唐家六葉太平罷宮艷醉骨恬無憂孽虜詬天翠華出糝糊戰血
腥九州乾瘡坤夷四海破白日殺氣寒颼颼少陵背賊走行在採
椐拾橡填飢喉眼前亂離不忍見作詩感慨陳大猷北征之篇辭
最切讀者心隕如搖轉莫肯念亂小雅怨自然流涕袁安愁才高
位下言不入憤氣鬱屈蟠長虬今日奔亡匪天作向來顛倒皆廟
謀忠骸佞骨相撐拄一燎同燼悲崑邱相君覽古慨前事追美子
美真詩流前王不見後王見願以此語詒千秋

白鶴圖

得黃筌事於景仁

梅堯臣

雙睛射空眼角聳筋爪入節韝條垂翅排霜刀毛綴甲雪色愁突
秋雲披當時始得不知價朝發海東夕九疑世為奇俊玩不足奪
質移神歸畫師而今推向深堂上燕雀屏絕窺畫師黃筌出
西蜀成都范君能具知范云筌筆不取次自養鷹鷂觀所宜毳毛
植立各有態剡奇剔怪乃肯為尋常飼鷹多捕鼠捕鼠往往驅其

兒其兒長大好飛走其孫賣鼠迭又衰范君語此亦有味欲戒近
習無他移

送葛都官南歸

梅堯臣

不羨新為赤縣尹惟羨暫向江南歸江南羃羃梅雨時風帆差差
並鳥飛翳竿夾岸長若梳水籠畜魚鮮且肥家在千山古溪上先
應喜鵲噪門扉

和吳冲卿元會

梅堯臣

千官車馬闐闐來晝漏始上閭闔開峨峨左右昇龍進昨夜雪飛
雲作堆殿前冠劍魚鱗立東風入仗旗腳迴黃鍾一奏寶扇掩玳
簾卷起香霧排鳴梢未盡霹靂響翠輦已退黃金階聖人端冕御
法座大樂旅作聲和諧羣公扞蹈丹墀下尚書奏瑞四夷懷乘輿
卻入更衣閣通天絳袍陞玉榻百拜稱觴萬歲間兩廊賜食簪裾
匝曲傳太定舞綴疎波旋煙斂飭宮車衛官解嚴多士退日光亭
午氣象舒吳君才筆天下傑歸來作詩傳石渠石渠祕邃無凡愚

石渠酬唱皆嚴徐我慙短學復在後收餘掇棄聊以書

論學

孫復

冥觀天地何云為茫茫萬物爭蕃滋羽毛鱗介各異趣披攘攫搏紛相隨人亦其閒一物爾餓食渴飲無休時苟非道義充其腹何異鳥獸安鬚眉人生在學勤始至不勤求至無由期孟軻荀況揚雄氏當時未必皆生知因其鑽仰久不已遂入聖域爭先馳既學便當窮遠大勿事聲病淫哇辭斯文下衰吁已久勉思駕說扶顛危擊暗毆聾明大道身與姬孔為藩籬是非豐穎若不學慎無空使精神疲

漁翁

劉敞

白頭老翁披敗蓑求魚終日單淮波波深水澗望不絕綱目雖繁能幾何大魚鱣鱔入淵底小魚鯢鯢登綱裏手馱足趼吁可憐何不為綱大如天

朱雲

劉敞

志士不忘棄溝壑勇士不忘喪其元伏雞搏狸狗襲虎感激只在精神存漢朝凌替外戚盛五岳振蕩三辰昏臣彊主弱上不悟廷中唯唯誰能言朱生節義邁金石面劾不避師傅尊願求向方斬馬劍誅一厲百清其源天威振怒不我受利刃接頸雷霆奔當前折檻色不變命在頃刻誰攀援昔時仲尼魯司寇七日行戮端乾坤嗟哉此生志不就冥冥后土埋其冤漢家社稷變王氏張禹虛蒙師保恩卓然先見在物表佞臣販國誰復論我願乘雲款天闈巫陽掌夢招其魂立朝審審辨邪正無復姦諛開幸門

道傍田家

司馬光

田家翁媪俱垂白敗屋蕭條無壯息翁攜鎌索媪攜箕自向薄田收黍稷靜夜偷春避債家比明門外已如麻筋疲力弊不入腹未議縣官租稅促

虎圖

王安石

壯哉非羆亦非羆目光夾鏡當坐隅橫行妥尾不畏逐顧盼欲去

仍躊躇卒然一見心為動熟視稍稍磨其鬚固知畫者巧為此此物安肯來庭除想當槃礴欲畫時睥睨眾史如庸奴神閒意定始一掃功與造化論鎔銖悲風颯颯吹黃蘆上有寒雀驚相呼槎牙死樹鳴老鳥向之俛嚼如哺雛山牆野壁黃昏後馮婦遙看亦下車

張良

王安石

留侯美好如婦人五世相韓韓人秦傾家為主合壯士博浪沙中擊秦帝脫身下邳世不知舉國大索何能為素書一卷天與之穀城黃石非吾師固陵解鞍聊出口捕取項羽如嬰兒從來四皓招不得為我立棄商山芝洛陽賈誼才能薄擾擾空令絳灌疑

寄贈胡先生

王安石

孔孟去世遠矣信其聖且賢者質諸書焉耳翼之先生與予並時非若孔孟之遠也聞薦紳先生所稱述又詳於書不待見而後知其人也歎慕之不足故作是詩

先生天下豪傑魁胸臆廣博天所開文章事業望孔孟不復睥睨蔡與崔十年留滯東南州飽足藜藿安蒿萊獨鳴道德驚此民民之聞者源源來高冠大帶滿門下奮如百蟄乘雲雷惡人沮伏善者起昔時躑躅今騫回先生不試乃能爾誠令得志如何哉吾願聖帝營太平補葺廊廟扶頽披旒發續廣耳目照徹山谷多遺材先取先生作梁柱以次構架桷與榱羣臣南向帝深拱戴仰堂陛方崔嵬

丙申歲余在京師鄉人陳景回自南來弃其官得太子中允景回舊有地在蔡今將治園圃於其閒以自老余嘗有意於高山之下洛水之上買地築室以為休息之館而未果今景回欲詩遂道此意景回志余言異日可以知余之非戲云爾

蘇洵

岷山之陽土如腴江水平滑多鯉魚古人居之富者眾我獨厭倦思移居平川如手山水蹙恐我後世鄙且愚經行天下愛嵩岳遂

欲買地安妻孥晴原漫漫望不盡山色照野光如濡民生舒緩無
天札衣冠堂堂偉丈夫吾今隱居未有所更後十載不可無聞君
厭蜀樂上蔡占地百頃無邊隅草深野濶足狐兔水種陸收身不
劬誰知李斯顧秦寵不獲牽犬追黃狐今君南去已足老行看嵩
少當吾廬

和渙之深秋月夜書事

狄遵度

洞庭葉下涼颼颼凍天頑白凝不流圓月擬缺不忍缺輕露欲浮
終未浮憶吹朱籟鳳輶上更採紫芝雲嶠陬玉樓天半幾千尺珠
樹玲瓏懸上頭

雨

狄遵度

高林風怒雨聲黑小閣燈背人語闌誰知雲外月高照定是葉閒
鷺最寒時覺急飄愁未已似聞徐滴喜初翻驪駒北首榆關路天
晴煙樹沙磧寬

有竇復者世居鎮戎能道邊事

王陶

君不見鎮戎德順弓箭手耕種官田自防守相團置堡禦蕃軍下
視賊庭殊不有殺羊取骨燃艾灸試卜賊兵知入寇都校招呼入
堡居堡外重圍百里餘牆低城小不難破賊箭如棚城上過堡中
不及數十人且鬪且罵且欣欣登陴斫門謂平取應茲死傷已無
數窗閒走箭射酋豪一箭已聞哭聲舉將錦囊裹賊尸鳴金收
眾唯恐遲不唯城堡依然固吾眾不傷毫與釐自從干戈動四鄙
覆軍殺將曾無恥朝廷未省遺邊功何事此勳不聞紀安得天兵
百萬眾盡如此輩堅且勇

大孤山

黃庶

彭蠡百年南國襟萬頃蒼煙插孤岑不知天星何時落春秋不書
不可尋石怪木老鬼所附茲乃與水司浮沈鳴鴟大藤樹下廟祭
血不乾年世深舳艫千里不敢越割牲灑酒來獻斟我行不忍隨
人後許國肝膽神所歆落帆夜宿白鳥岸睥睨百繞寒藤陰銀山
大浪獨夫險比干一片崔嵬心宦遊遠去父母國心病若有山水

淫江南畫工今誰在拂拭東絹傾千金

通判國博命賦假山

陳襄

去年水潦百穀死居民無食食糟糝州之餓者數千人黃巖之民猶倍徙攜持老少出城郭盡徹牆屋無居止鬻妻棄子人不售價例不復論羊豕白日市井聞號叫夜堆廊廡如蟲豸縣官哀憐發賑救一飯纔得一孟爾出門未暇充喉咽已有數十填溝水我時過之不忍顧往往悲咽胸填委豈無智慮裨萬一遠地不得號君耳錢侯作倅忠且仁悲憐餓殍如親子日開官廩與之食又令豪右發儲峙昨日馳書白轉運披陳肝腎獻金矢更乞兵儲二萬斛民之大命方有倚侯從新年作假山自聞民飢不得視非無泉石可盤樂人今方瘁何能喜願侯勿遽愛此山念此腹臘存孤蟻天無疫癘五穀熟生者保聚歸田里此山之石堅不堅將與侯德無窮已

與子由別於鄭州西門之外馬上賦詩一篇寄之

蘇軾

不飲胡為醉兀兀此心已逐歸鞍發歸人猶自念庭幃今我何以慰寂寞登高回首坡隴隔惟見烏帽出復沒苦寒念爾衣裳薄獨騎瘦馬踏殘月路人行歌居人樂僮僕怪我苦悽惻亦知人生要有別但恐歲月去飄忽寒燈相對記疇昔夜雨何時聽蕭瑟君知此意不可忘慎勿苦愛高官職嘗有夜雨對牀眠之言故云

蘇軾

送安敦秀才失解西歸

舊書不厭百回讀熟讀深思子自知他年名宦恐不免今日棲遲那可追我昔家居斷還往著書不復窺園葵竭來東遊慕人爵棄去舊學從兒嬉狂謀謬算百不遂惟有霜鬢來如期故山松柏皆手種行且拱矣歸何時萬事早知皆有命十年浪走寧非癡與君未可較得失臨別唯有長嗟咨

蘇軾

送劉道原歸觀南康

晏嬰不滿六尺長高節萬仞陵首陽青衫白髮不自歎富貴在天

那得忙十年閉戶樂幽獨百金購書收散亡竭來東觀弄丹墨聊
借舊史誅姦強孔融不肯下曹操汲黯本自輕張湯雖無尺箠與
寸刃口吻排擊含風霜自言靜中閱世俗有似不飲觀酒狂衣巾
狼籍又屢舞旁人大笑供干場交朋翩翩去略盡惟我與子猶傍
徨世人共棄君獨厚豈敢自愛恐子傷朝來告別驚何速歸意已
逐征鴻翔匡廬先生古君子掛冠兩紀鬢未蒼定將文度置膝上
喜動鄰里烹猪羊君歸爲我道姓字幅巾他日容登堂

和錢安道寄惠建茶

蘇軾

我官于南今幾時嘗盡溪茶與山茗胸中似記故人面口不能言
心自省爲君細說我未暇試評其略差可聽建溪所產雖不同一
一天與君子性森然可愛不可慢骨清肉膩和且正雪花雨腳何
足道啜過始知真味永縱復苦硬終可錄汲黯少憇寬饒猛草茶
無賴空有名高者妖邪次頑獷體輕雖復強浮泛性滯偏工嘔酸
冷其閒絕品豈不佳張禹縱賢非骨鯁葵花玉鞞不易致道路幽

嶮隔雲嶺誰知使者來自西開緘磊落收百餅嗅香嚼味本非別
透紙自覺光炯炯糝糠團鳳友小龍奴隸日注臣雙井收藏愛惜
待佳客不敢包裹鑽權倖此詩有味君勿傳空使時人怒生癭

韓幹馬十四匹

蘇軾

二馬並驅攢八蹄二馬宛頸駿尾齊一馬任前雙舉後一馬卻避
長鳴嘶老髯奚官騎且顧前身作馬通馬語後有八匹飲且行微
流赴吻若有聲前者旣濟出林鶴後者欲涉鶴俛啄最後一匹馬
中龍不嘶不動尾搖風韓生畫馬眞是馬蘇子作詩如見畫世無
伯樂亦無韓此詩此畫誰當看

贈寫御容妙善師

蘇軾

憶昔射策干先皇珠簾翠幄分兩廂紫衣中使下傳詔跪捧再拜
聞天香仰觀眩晃目生暈但見曉色開扶桑迎陽晚出步就坐絳
紗玉斧光照廊野人不識日月角髣髴尙記重瞳光三年歸來眞
一夢橋山松檜淒風霜天容玉色誰敢畫老師古寺畫閉房夢中

神授心有得覺來信手筆已忘幅巾常服儼不動孤臣入門涕自滂元老侑坐鬚眉古虎臣立侍冠劍長平生慣寫龍鳳質肯顧草閒猿與獐都人踏破鐵門限黃金白壁空堆牀爾來摹寫亦到我謂是先帝白髮郎不須覽鏡坐自了明年乞身歸故鄉

定惠院寓居月夜偶出

蘇軾

幽人無事不出門偶逐東風轉良夜參差玉宇飛木末繚繞香煙來月下江雲有態清自媚竹露無聲浩如瀉已驚弱柳萬絲垂向有殘梅一枝亞清詩獨吟還自和白酒已盡誰能借不辭青春忽忽過但恐歡意年年謝自知醉耳愛松風會向霜林結茅舍浮浮大甌長炊玉溜溜小槽如壓蔗飲中真味老更濃醉中狂言醒可怕但當謝客對妻子倒冠落佩從嘲罵

豆粥

蘇軾

君不見滹沱流澌車折軸公孫倉皇奉豆粥溼薪破竈自燎衣飢寒頓解劉文叔又不見金谷敲冰草木春帳下烹煎皆美人萍齏

豆粥不傳法咄嗟而辦石季倫干戈未解身如寄聲色相纏心已醉身心顛倒自不知更識人閒有真味豈如江頭千頃雪色蘆葦簷出沒晨煙孤地確春秔光似玉沙瓶煮豆軟如酥我老此身無著處賣書來問東家住臥聽雞鳴粥熟時蓬頭曳履君家去

答西掖諸公見和

蘇軾

雙猊蟠礎龍纏棟金井輓轡鳴曉甕小殿垂簾碧玉鉤大宛立仗朱絲鞢風馭寶天雲雨隔孤臣忍淚肝腸痛羨君意氣風生坐落筆縱橫盤走汞上樽日日寫黃封賜茗時時開小鳳閉門憐我老太玄給札看君賦雲夢金奏不知江海眩木瓜屢費瓊瑤重豈惟蹇步困追攀已覺侍史疲犇送春還宮柳腰支活雨入御溝鱗甲動借君妙語發春容顧我風琴不成弄

虢國夫人夜游圖

蘇軾

佳人自鞚玉花驄翩如驚燕踏飛龍金鞭爭道寶釵落何人先入明光宮宮中羯鼓催花柳玉奴絃索花奴手坐中入姨真貴人走

馬來看不動塵明眸皓齒誰復見只有丹青餘淚痕人閒俯仰成
今古吳公臺下雷塘路當時亦笑張麗華不知門外韓擒虎

郭熙畫秋山平遠跋路公為

蘇軾

玉堂畫掩春日閑中有郭熙畫春山鳴鳩乳燕初睡起白波青嶂
非人閒離離短幅開平遠漠漠疎林寄秋晚恰似江南送客時中
流回頭望雲巘伊川佚老鬢如霜臥看秋山思洛陽為君紙尾作
行草炯如嵩洛浮秋光我從公游如一日不覺青山映黃髮為畫
龍門入節灘待向伊川買泉石

任氏閱世堂前大檜

蘇轍

君家大檜長百尺根如車輪身絃直壯夫連臂不能抱孤鶴高飛
直上立狂風動地舞枝幹大雪翻空洗顏色人言此檜三百年未
知此是何人植君家大夫老不遇一生直氣未嘗屈沒身不說歸
故里遺愛自知懷舊邑此翁此檜兩相似相與閱世何終極汝南
山淺無良材櫟杜棟椽聊障日便令殺身起大厦亦恐眾材無匹

敵且留枝葉撓雲霓猶得世人長歎息

韓信二首

黃庭堅

韓信高才跨一世劉項存亡翻手耳終然不肯負沛公頗似雍容
得天意成舉日夜望救兵取齊自重身已輕躡足封王能早悟豈
恨淮陰食千戶雖知天下有所歸獨憐身與噲等齊蒯通狂說不
可撼陳豨孺子胡能為予嘗貰酒淮陰市韓信廟前柏十圍千年
事與浮雲去想見留侯決是非丈夫出身佐明主用捨行藏要自
知功名邂逅軒天地萬事當觀失意時

杜子美浣花醉歸圖

黃庭堅

韓生沈鷺非悍勇笑出跨下良自重滕公不斬世未知蕭相自道
王始用成安書生自聖賢左仁右義兵在咽萬人背水亦書意獨
驅市井收萬全功成廣武坐東鄉人言將軍真漢將兔死狗烹姑
置之此事已足千年垂君不見丞相商君用秦國平生趙良頭雪
白

拾遺流落錦官城故人作尹眼爲青碧雞坊西結茅屋百花潭水
濯冠纓故衣未補新衣縱空蟠胸中書萬卷探道欲度羲皇前論
詩未覺國風遠干戈崢嶸暗寓縣杜陵韋曲無雞犬老妻稚子且
眼前弟妹漂零不相見此公樂易真可人園翁溪友肯卜鄰鄰家
有酒邀皆去得意魚鳥來相親浣花酒船散車騎野牆無主看桃
李宗文守家宗武扶落日蹇驢馱醉起願聞解兵脫兜鍪老儒不
用千戶侯中原未得平安報醉裏眉攢萬國愁生綃鋪牆粉墨落
平生忠義今寂寞兒呼不蘇驢失腳猶恐醒來有新作常使詩人
拜畫圖煎膠續絃千古無

送范德孺知慶州

黃庭堅

乃翁知國如知兵塞垣草木識威名敵人開戶近處女掩耳不及
驚雷霆平生端有活國計百不一試薶九京阿兄兩持慶州節十
年麒麟地上行潭潭大度如臥虎邊人耕桑長兒女折衝千里雖
有餘論道經邦政要渠妙年出補父兄處公自才力應時須春風

旂旂擁萬夫幕下諸將思草枯智名勇功不入眼可用折箠笞羌
胡

送謝公定作竟陵主簿

黃庭堅

謝公文章如虎豹至今斑斑在兒孫竟陵主簿極多聞萬事不理
專討論澗松無心古須鬣天球不琢中粹温落筆塵沙百馬奔劇
談風霆九河翻胸中恢疎無怨恩當官持廉且不煩吏民欺公亦
可忍慎勿驚魚使水渾漢濱耆舊今誰存駟馬高蓋徒紛紛安知
四海習鑿齒拄笏看度南山雲

出城送客過故人東平侯趙景珍墓

黃庭堅

朱顏苦留不肯住白髮政爾欺得人嬋娟去作誰家妾意氣都成
一聚塵今日牛羊上邱壟當時近前左右嗔花開鳥啼荆棘裏誰
與平章作好春

武昌松風閣

黃庭堅

依築山閣見平川夜闌箕斗插屋椽我來名之意適然老松魁梧

數百年斧斤所赦今參天風鳴媧皇五十絃洗耳不須菩薩泉嘉
二三子甚好賢力貧買酒醉此筵夜雨鳴廊到曉懸相看不歸臥
僧種泉松石燥復潺湲山川光輝爲我妍野僧早飢不能飽曉見
寒谿有炊煙東坡道人已沈泉張侯何時到眼前釣臺驚濤可畫
眠怡亭小篆蛟龍纏安得此身脫拘攣舟載諸友長周旋

書磨崖碑後

黃庭堅

春風吹船著活溪扶藜上讀中興碑平生半世看墨本摩挲石刻
髮成絲明皇不作包桑計顛倒四海由祿兒九廟不守乘輿西萬
官已作鳥擇棲撫軍監國太子事何乃趣取大物爲事有至難天
幸爾上皇跼蹐還京師內開張后色可否外開李父頤指揮南內
淒涼幾苟活高將軍去事尤危臣結春秋二三策臣甫杜鵑再拜
詩安知忠臣痛至骨世上但賞瓊琚詞同行野僧六七輩亦有文
士相追隨斷崖蒼蘚對久立陳雨爲洗前朝悲

滄洲亭懷古

沈遼

瀟水悠悠天際來夾江古木抱山回柵中人物不滿把日晏市散
多蒼苔九疑巉天古雲埋遙想帝子龍車迴心衰目極何可望九
歌寂寂令人哀

縱步湘西

張舜民

今朝不易得天晴閒過江西取意行忽然林外見山色又向橋邊
聞水聲綠竹長松閒桃李天然翠幙圍羅綺日暮歸舟醉不知晚
風吹過湘江水

寒夜

張耒

暗空無星雲抹漆邑犬叫野人履霜歲云莫矣風落木夜如何其
斗插江屋頭眠雞正寂寂野縣嚴鼓先逢逢摩挲老面起吹火春
色牀頭酒滿缸

謁客

張耒

入門投謁吏翩翩我非欲見禮則然異哉賓主兩無語客起疾走
如避燃我已不恭愧昔賢忍使塗炭朝衣冠人生暫聚鴻集川春

風吹飛何後先

有感

張耒

羣兒鞭笞學官府翁憐兒笞傍笑侮翁出坐曹鞭復呵賢於羣兒能幾何兒曹相鞭以為戲翁怒鞭人血流地等為戲劇誰後先我笑謂翁兒更賢

北鄰賣餅兒每五更未旦即繞街呼賣雖大寒烈風不廢而時略不少差因為作詩且有所警示秬秸

張耒

城頭月落霜如雪樓頭五更聲欲絕捧盤出戶歌一聲市樓東西人未行北風吹衣射我餅不憂衣單憂餅冷業無高卑志當堅男兒有求安得閑

奉先寺

張耒

荒涼城南奉先寺後宮美人官葬此角樓相望高起墳草閒柏下多石人秩卑焚骨不作塚青石浮屠當邱壠家家墳上作亭亭朱門相向無人聲樹頭土梟作人語月黑風悲鬼搖樹宮中養女作子孫年年犢車來作主廢后陵園官道側家破無人埽陵域官家歲給半年錢街頭買餅作寒食

美哉

張耒

美哉洋洋清潁尾西通天邑無千里舸舫大艣起危檣淮潁耕田倍收米芒芒陂澤帶平原古時溝澗還相連昔人屯田戍兵處今人阡陌連邱墓今年雨足種麥多北風吹桑鳴空柯高城回望鬱嵯峨豐年閭井聞笙歌河邊古隄多老柳去馬來船一回首百年去住不由人歲暮天寒聊飲酒

紫驪馬

許彥國

黃金絡頭玉為釵蜀錦障泥亂雲葉花閒顧影驕不行萬里龍駒空汗血露牀秋粟飽不食青芻苜蓿無顏色君不見東郊瘦馬百戰場天寒日暮烏啄瘡

墨染絲

郭祥正

纈絲自喜如霜白輸入官家吏嫌黑手持退印競傳呼倏見長條
染深墨墨絲歸織家人衣別買輸官吏嗔遲寄言夷狄與三軍汝
得豐衣民苦辛

浯溪

潘大臨

公泛浯溪春水船繫帆啼鳥青崖邊次山作頌今幾年當時治亂
春風前明皇聰明真晚謬乾坤付與哥奴手骨肉何傷九廟焚蜀
山騎驢不回首天下寧知再有唐皇帝紫袍迎上皇神器蒼忙吾
敢惜兒不終孝聽五郎父子幾何不豺虎君臣寧能責胡虜南內
淒涼誰得知人閒稱家作端午平生不識顏真卿去年不答高將
軍老來讀碑淚橫臆公詩與碑當共行不賞邊功寧有許不殺奉
皇猶敢語雨淋日炙字未訛千秋萬歲所鑿多

豫章別李元中宣德

謝逸

舊聞諸李隱龍眠伯時已老元中少一行作吏各天涯故人落落
疎星曉西山影裏識君面碧照草江睥子瞭向來問道渺多歧只

今領略歸玄妙老鳳垂頭噤不語古木查牙噪春鳥身在幕府心
江湖左胥右律但坐嘯第愁一葉釣漁舟不容七尺堂堂表我今
歸卧靈谷去君應紫禁鶯花繞相思有夢到茅齋細雨青燈坐林
杪

聞徐師川自京師還豫章

謝逸

九衢塵裏無停舟君居陋巷不出遊滿城惡少弋鳧雁對面故人
風馬牛別後覓寒燈火夜歸來眼冷江湖秋馮驩老大食不飽起
視八荒挺蒯緤

早春偶題

崔鷗

寒風浙瀝鳴枯葦小鴨睡殘猶未起更教細雨結輕寒坐聽蕭蕭
打窗紙石盆養蒲已抽翠雕斛栽花先弄紫擁爐閉閣賦幽香未
怕春冰生硯水

阻風雨封家市

李彭

往時李成寫驟雨萬里古意豪端聚行人深藏鳥不度便覺非復

鵝溪素龍眠老院作陽關北風低草雲埋山行人客子兩愁絕未
信蒲萄能解顏兩郎了解人意似是畫我封家市戲作新詩排
晝睡忽有野雁鳴煙際

夢訪友生

李彭

少年結客長安城妄喜縱酒一章程支離老去一茅屋枕書卧聞
長短更友生相望止百里寒夜寥闐無微聲夢中乘輿輒見戴剡
溪聊爾扁舟行覺來蘧蘧一榻上不用僮僕爭驩迎吹燈弄筆欲
書寄窗前月白方亭亭

宋文鑑卷第二十一

宋文鑑卷第二十二

詩

五言律詩

中秋月

王禹偁

送枝江秦長官罷秩

鄭文寶

送曹緯劉鼎二秀才

鄭文寶

夜泊江上

寇準

春日登樓懷歸

寇準

楚江夜懷

寇準

題太湖

羅處約

受詔修書述懷感事三十韻

楊億

至郡累旬惡風

楊億

獄多重囚

楊億

梁縣界野蚘蟲生

楊億

楚中庭樹

錢惟演

寄楊頃

趙湘

答徐本

趙湘

喜故人至

王操

送人南歸

王操

南兵

錢易

上知府寇相公

魏野

書友人屋壁

魏野

閒居書事

魏野

述懷

魏野

夏日宿西禪

潘閔

敘吟

潘閔

歲暮自桐廬歸錢塘晚泊漁浦

潘閔

銘坐石

張齊賢

酬陳齊民見寄

勘書

孫放

江南立春日

呂夷簡

秋日旅懷

江為

江行

江為

經戰地

魯交

大雪

魯交

野水

錢昭度

塞上作

唐異

閒居書事

唐異

瀑布

石延年

曹太尉西師

石延年

春

石延年

赴桐廬郡至淮上遇風

范仲淹

瀑布

范仲淹

堯廟

范仲淹

野色

范仲淹

八月十四夜月

范仲淹

題養真亭

韓琦

有將獨鶴行都市道上者左右奔迫野態憔悴因成短韻

宋庠

春夕

宋庠

羣玉殿賜宴

歐陽修

下直呈同行三公

歐陽修

東閣雨中

歐陽修

秋懷

歐陽修

東晉

宋祁

詠史

宋祁

遣吏視諸公瑩樹回有感三首

文正王丞相宣獻宋公 文靖呂丞

僻居

宋祁

中秋月

王禹偁

何處見清輝登樓正午時莫辭終夕看動是隔年期冷溼流螢草
光凝睡鶴枝不禁雞唱曉輕別下天涯

送枝江秦長官罷秩

鄭文寶

眾論才名外親人似古人官嫌容易達家愛等閒貧解印詩權在
移風澤國春政聲交不得慙見數鄉民

送曹緯劉鼎二秀才

鄭文寶

旦夕春風老離心共黯然小舟聞笛夜微雨養花天手筆人皆有
曹劉世所賢柳侯重才子從此看鶯遷

夜泊江上

寇準

歲暮峽中村維舟古樹根羣峰初落月夜後獨聞猿流水自無盡

客愁那可論平明離楚岸迢遞指吳門

春日登樓懷歸

寇準

高樓聊引望杳杳一川平野水無人渡孤舟盡日橫荒村生斷霞

古寺語流鶯舊業遙清渭沈思忽自驚

寇準

西風生遠水蕭颯度吟臺明月夜還滿故人秋未來寒蛩啼暗壁

楚江夜懷

羅處約

敗葉下蒼苔誰念空江水年年首重回

三萬六千頃湖侵海內田逢山方得地見月始知天南國吞將盡

楊億

東溟勢欲連何當酒爲雨無處不豐年

太極垂裳日中原偃革初樓船秋發詠衡石夜程書好問虛前席

微賢走傳車蓬萊侔漢制煨燼訪秦餘紉繹資金匱規模出玉除

紛綸開四部祕窻接千廬飫賜雙雞膳親迴六尺輿華芝下閭闔

白羽擁儲胥望氣成龍虎披文辨魯魚清光無咫尺玄覽亦躊躇

羣彥揮鉛筆微生濫石渠嵇康真懶慢謝客本空疎講學情田垌

談經腹笥虛月評依許邵文體慕相如雅飲歡娛合清言鄙吝祛

彌旬容出沐終日喜羣居撫已慙鳴玉歸田憶荷鋤池籠養魚鳥

章服畏猿狙園府愁尸祿天閨愧弊裾虛名同鄭璞散質類莊樗

國士誰知我鄰家或侮子放懷齊指馬屏息度羲舒寡婦宜憂緯

三公亦灌蔬危心惟穀棘直道忍蘧蔭往聖容巢許先儒美甯蘧

晨趨歎勞止夕惕念歸歎秦痔疎杯酒顏瓢賴斗儲如諧曲肱臥

猶可直鈎魚矯矯龜銜印翩翩隼畫旗一麾終遂志阮籍去騎驢

至郡累旬惡風

鄧禹功曹器馬周令長才叨臨萬室郡驟致五風災大木行將拔

繁雲黯不開自知蒙闇極民吏竊相哈

獄多重囚

鐵鑱銀鐙眾金科伏念頻絕聞空獄奏深媿片言人清穎黃公接

楊億

黃霸為潁川守八年獄無重罪囚甘棠邵伯鄰懷賢不能繼多辟豈由民

梁縣界野蚘蟲生楊億

方喜雲田布俄聞葉騰生田神何縱虐稼政自非明潁鳳那充食

吳牛已絕耕牛多疫死黃堂厭梁肉惕爾自心驚錢惟演

紫闥分陰地丹條擢秀時高枝接温樹密葉覆辛夷夜影瑤光接

晨英玉露滋乘春好封殖為賦角弓詩趙湘

閉門苔自長春恨極天涯落日山橫水空城雨過花斷狂曾避蝶

多病更無蛙江上無消息風吹渡柳斜趙湘

天遠草離離秋霖寄信遲相思逢葉盡獨坐聽蟬悲岳色寒前見

松心雪後知頻招猶未至時復檢清辭王操

地僻無賓侶柴門晝始開谿山寒葉落江國故人來話舊驚霜鬢

論詩滯酒杯相留喜同宿不寐曙光迴王操

相送當搖落孤舟泛渺瀰去帆看已遠臨水立多時別浦寒鴻下

空山夜鶴移他年重會面冷鬢共成絲錢易

曾見南兵苦征遼事一如金瘡寒長肉紙甲雨生蛆山小齋霜骨

河枯臙腐魚黎元無處哭丁戶日相踈魏野

文武稟全才何人更可陪有官居鼎鼐無地起樓臺聖主詩方和

親王狀始迴鎮臨求二陝調變輟三台鳳閣須重去龍旌暫擁來

下車三度雨上事數星雷未暇瞻珪璧先蒙話草萊幾思趨相府

恐懼復徘徊魏野

達人輕祿位居處傍林泉洗硯魚吞墨烹茶鶴避煙閑唯歌聖代
老不恨流年靜想相尋者還應我最偏

閑居書事

魏野

無才動聖君養拙住山村臨事知閑貴澄心覺道尊成家書滿屋
添口鶴生孫仍喜多時雨經春免灌園

述懷

魏野

東郊魏仲先生計只隨緣任懶自埽地更貧誰怨天有名閑富貴
無事小神仙不覺流光速身將半百年

夏日宿西禪

潘閔

此地絕炎蒸深疑到不能夜涼如有雨院靜若無僧枕潤連雲石
聰明照佛燈浮生多骨賤時日恐難勝

敘吟

潘閔

高吟見太平不恥老無成髮任莖莖白詩須字字清搜疑滄海竭
得恐鬼神驚此外非閑念人間萬事輕

歲暮自桐廬歸錢塘晚泊漁浦

潘閔

久客見華髮孤櫂桐廬歸新月無朗照落日有餘輝漁浦風水急
龍山煙火微時驚沙上雁一一背南飛

銘坐右

張齊賢

慎言渾不畏忍事又何妨國法須遵守人非莫舉揚無私仍克己
直道更和光此箇如端的天應降吉祥

酬陳齊民見寄

种放

竹扉常晝掩幽僻置身安自委漁樵分因思出處難周庭方設燎
漢將尙封壇莫問漁樵意人寰事萬端

勘書

孫僅

儒家無外事招客勘青編筆墨東西置朱黃次第研頻憂傷點竄
細恐誤流傳改易文辭正增加字數全目因繁處倦心向注中專
端坐窮今古披襟見聖賢疲勞時舉白遊息或談玄得興忘昏旭
題名記歲年揮毫思確論廢卷恨亡篇魚魯皆刊定誰人敢閒然

江南立春日

呂夷簡

灰律何時應江春昨夜來細風先動柳殘雪不藏梅餘冷迷清管
微和發凍醅閉門無客到樽俎為誰開

秋日旅懷

江為

迢迢江漢路秋色又堪驚半夜聞鴻雁多年別弟兄高風雲影斷
微雨菊花明欲寄東歸信徘徊無限情

江行

江為

越信隔年稀孤舟幾夢歸月寒花露重江晚水煙微岸直帆相望
沙空鳥竝飛何時洞庭上春雨滿蓑衣

經戰地

魯交

西邊用兵地黯慘無人耕戰士報國死寒草迎春生沙飛賊風起
晝黑陣雲橫未持天下帚何以埽機槍

大雪

魯交

萬象曉一色皓然天地中楚山雲母障漢殿水精宮遠近梅花信

高低柳絮風吟魂清不徹和月上晴空

野水

錢昭度

野水光如壁澄心不覺勞與天無表裏共月見分毫綠好磨長劍
清宜汎小舸淡交今已矣惆悵越波濤

塞上作

唐異

防秋人不到萬里絕妖氛馬放降來地鵬閑戰後雲月依孤壘沒
燒逐遠荒分未省為邊客宵笳懶欲聞

閑居書事

唐異

幽居輕宿雨屐齒徧林塘一境無過客千山自夕陽晝禽多獨語
夏木有餘涼招隱詩慵寄時清誰肯忘

瀑布

石延年

飛勢挂岳頂無時向此傾玉虹垂地色銀漢落天聲萬丈寒雲溼
千巖暑氣清滄浪不足羨就此濯塵纓

曹太尉西師

石延年

仁者雖無敵王師尚有征獨乘金殿馬都領鐵林兵肅氣關河暮
屯煙部落晴旗光秋燒去甲色夜江橫士喜擊中鼓虜疑聞後鉦
無私乃時雨不殺是天聲濯濯前誰拒堂堂彼自傾寒逾博望塞
春燕隗囂城外使戎心伏旁資帝道平公還如畫像為贊學班生

春

石延年

一氣回元運恩含萬物深陰陽造化首天地發生心有信來還去
無私古到今和風激遺暢南轉入薰琴

赴桐廬郡至淮上遇風

范仲淹

聖宋非疆楚清淮異汨羅平生仗忠信盡室任風波舟楫顛危甚
蛟龍出沒多斜陽幸無事沽酒聽漁歌

瀑布

范仲淹

迥與眾流異發源高更孤下山猶直在到海得清無勢鬪蛟龍惡
聲吹雨電麓晚來雲一色詩句自成圖

堯廟

范仲淹

千古如天日巍巍與善功禹終平涿水舜亦致薰風江海生靈外
乾坤揖讓中鄉人不知此簫鼓謝年豐

野色

范仲淹

非煙亦非霧羃羃映樓臺白鳥忽點破夕陽還照開肯隨芳草歇
疑逐遠帆來誰會山公意登高醉始迴

八月十四夜月

范仲淹

光華豈不盛賞宴尚遲遲天意將圓夜人心待滿時已知千里共
猶訝一分虧來夕如澄霽清風不負期

題養真亭

韓琦

新葺公居比虛亭號養真所期清策慮不是愛精神滿目林壑趣
一心忠義身吏民還解否吾豈苟安人

有將獨鶴行都市道上者左右奔迫野態憔悴因成短韻

宋庠

明心本霄漢此路極喧埃何意鳴皋罷翻同舞市來波臣憂輟涸

海鳥避風災寄語昂昂質非君羽獨摧

春夕

宋庠

暝色蔽孤齋空軒向夕開花低應露下月暗覺雲來燭牖輕蛾聚
風枝倦鳥猜無言聊隱几萬境一靈臺

羣玉殿賜宴

歐陽修

至治臻無事豐年樂有成圖書開祕府宴飫集羣英論道皇墳奧
貽謨寶訓明九重多暇豫八體極研精筆力千鈞勁豪端萬象生
飛牋金灑落拜賜玉鏘鳴盛際崇儒學愚臣濫寵榮惟能同舞獸
聞樂識和聲

下直呈同行三公

歐陽修

午漏聲初轉歸鞍路偶同天清黃道日街潤綠槐風萬國舟車會
中天象魏雄戢戈清四海論道屬三公自愧陪羣彥從來但樸忠
時平容竊祿歲晚歎衰翁買地淮山北垂竿潁水東稻梁雖可戀
吾志在冥鴻

東閣雨中

歐陽修

直閣時偷暇幽懷坐獨哦綠苔人迹少黃葉雨聲多雲結愁陰重
風傳禁漏過瑤圖新嗣聖玉塞久包戈相府文書簡豐年氣候和
還將鳳池句聊雜野人歌

秋懷

歐陽修

節物豈不好秋懷何黯然西風酒旗市細雨菊花天感事悲霜鬢
包羞食萬錢鹿車終日駕歸去潁東田

東晉

宋祁

倉卒浮江日聲明建號初羣臣讓禁臠上宰製單練氣銳開桁戰
心歡折屐書織兒競撞壞不念好家居

詠史

宋祁

古有容容福人譏齷齪員生貪巧作奏死戒直如弦欲重高門地
非論媚竈天詩書大儒家絲竹後堂旃東閣翻芻馬西園竊瘞錢
道謀誰執咎戶選不因賢朱鼓成妖日羌雛入賀年須防反室詔

終取闔門憐異日讒成錦先時默似蟬空貽後人嘆流涕掩青編

遣吏視諸公瑩樹回有感三首

宋 祁

文正王丞相

兩朝推巨德萬務罄斯猷漢日左右手堯年忠孝侯名言天下滿

故事省中留宸篆旌碑首刊文又幾秋

予作碑陰述其事

文靖呂丞相

慶厯公三入虜謀搖太平啖金真閒敵撓呼高酒不寒盟上印情

雖切退不許然髭疾遽輕服之病愈

惜哉天弗憖宸幄淚先

橫殿間之對長勳

宣獻宋公

昔去勸明辟勸還政俄歸參大鈞公孫未及相諸葛已傷神名

待天淵蔽文爭日月新英魂同玉樹不向土中春

燕 肅

蓬茅城市遠草徑接漁村白日偶無客青山長對門藥鑪留火暖

花塢帶煙昏靜坐搜新句冥心傍酒罇

宋文鑑卷第二十二

宋文鑑卷第二十二

宋文鑑卷第二十三

詩

五言律詩

泛溪

梅堯臣

發刁陵

梅堯臣

聞雁

梅堯臣

和謝仲弓廷評栽竹

梅堯臣

覽含元殿基因想昔時朝會之盛且感其興廢

蘇舜欽

五哀詩

屈平 李牧 晁大夫
馬伏波 斛律丞相

司馬光

訪徐冲晦

郎簡

卽事

王安石

招丁元珍

王安石

半山春晚卽事

王安石

定林

自白上村入北寺

和象之北軒書事

平居

明皇

送趙樞寺丞宰虔化縣

出嶺題石灰鋪

同宋復古遊大林寺

冬至

晚涼閒步

重九登石閣

悟人一言

陳公廡園修禊事席上賦

和王正仲熙寧郊祀二十韻

王安石

王安石

韓維

王安國

鄭獬

陶弼

陶弼

周敦頤

邵雍

邵雍

邵雍

程顥

劉放

和鄭閣中仙居

和子由初到陳州

過廣愛寺觀朱瑤畫

過淮

乘舟過賈收水閣二首

郊祀慶成

新年二首

倦夜

次韻江海叔

次韻公定世弼登北都東樓二首

歲寒知松柏

款塞來亭

神宗皇帝挽詞二首

次韻崔伯易席上所賦

陳襄

蘇軾

蘇軾

蘇軾

蘇軾

蘇軾

蘇軾

蘇軾

蘇軾

黃庭堅

黃庭堅

黃庭堅

黃庭堅

黃庭堅

司馬文正公挽詞二首

黃庭堅

范忠文公挽詞二首

黃庭堅

和答錢穆父詠猩猩毛筆

黃庭堅

次韻秦少章晁適道贈答詩

黃庭堅

和文潛舟中所題

黃庭堅

漢陽親舊攜酒追送聊為短句

黃庭堅

次韻廖明略陪吳明府白雲亭宴集

黃庭堅

贈楊明叔

黃庭堅

閒居有感

李宗易

江上逢晁適道

崔子方

荷花

豐稷

寄鄭介夫

畢仲游

春日獨遊南園

楊蟠

聞赦有作

張舜民

曾子固挽詞二首

陳師道

司馬溫公挽詞二首

陳師道

登城樓

陳師道

和王子安至日

陳師道

送吳先生謁惠州蘇副使

陳師道

懷遠

陳師道

張芻令餘杭

孫處

種圃

張耒

近清明

張耒

晨興

張耒

都梁亭下

張耒

舟中曉思

張耒

南澗月夕

俞紫芝

廣武山懷古

劉季孫

春日遊金明池

李昭玘

獨步懷元中

洪朋

宿范氏水閣

洪朋

石牛莊閒居

崔鷗

見黃太史

高荷

題折氏下城園

吳則禮

春日書懷

潘大臨

江上晚步

潘大臨

題呂少馮聽雨堂

李彭

春日有懷

林敏功

泛溪

梅堯臣

中流清且平捨楫任船行漸近鷺猶立已遙村覺橫何妨綠樽滿
不畏晚風生屈賈江潭上愁多未適情

發勺陵

梅堯臣

秋雨密無跡濛濛在一川孤村望漸遠去鳥飛已先向晚雲漏日
微光人倚船安知偶自適落岸逢沙泉

聞雁

梅堯臣

溼雲夜不散薄處微有星孤雁去何急一聲愁更聽心應失舊侶
翅已高青冥幾日江湖上鳧鷗共滿汀

和謝仲弓廷評栽竹

梅堯臣

移得溪邊翠來為庭下陰惜根存舊土帶筍助新林暗換蕭蕭葉
知虛寸寸心東風莫搖撼培壅未應深

覽含元殿基因想昔時朝會之盛且感其興廢

蘇舜欽

在昔朝元日千門動地來方隅正無事輔相復多才仗下簪綬肅
天中繖扇開皇威瞻斗極曙色辨崔嵬赤案波光卷鳴鞭電尾回
熊羆驅禁衛雨露覆蘭臺橫賜傾中帑窮奢役九垓只知營國用
不畏屈民財翠輦還移幸旻天未悔災羣心爭困獸回首變寒灰

曾以安無慮翻令世所哀行人看碧瓦獨鳥下蒼苔雖念陵爲谷
遙知禍有胎青編遺迹在此地亦悠哉

五哀詩

司馬光

孔子惡利口之覆邦家者甚矣讒之爲害不可一二數也聊觀戰
國以來楚之屈原趙之李牧漢之晁錯馬援齊之斛律光皆負不
世之才竭忠於上然卒困於讒不能自脫流亡不得其所而死或
者國隨以邱墟此其尤可大哀者也因卽其事作五哀詩且以警
後世云

屈平

白玉徒爲潔幽蘭未謂芳窮羞事令尹疎不忘懷王寃骨銷寒渚
忠魂失舊鄉空餘楚辭在猶與日爭光

李牧

椎牛饗壯士拔距養奇材虜帳方驚避秦金已闔來旌旗移幕府
荆棘蔓叢臺部曲依稀在猶能話郭開

晁大夫

人主恩猶盛讒夫弄舌端旋聞就斧鑕不得解衣冠反虜齒纒冷
謀臣心盡寒晁宗噍類盡漢室泰山安

馬伏波

漢合班南海蠻兵避鬱林天涯柱分界徼外貢輸金坐失姦臣意
誰明報國心一棺忠勇骨漂泊瘴煙深

斛律丞相

君臣日荒宴歌舞諱言愁老相猶當國強鄰不敢謀謠言雖未出
姦謗已先流誰察忠臣意通宵抱膝憂

訪徐冲晦

郎簡

湖上訪高士徑深行綠苔應聞山犬吠知是野人來岸幘出相接
柴門自爲開林閒清話久薄暮榜舟回

卽事

王安石

徑暖草如積山晴花更繁縱橫一川水高下數家村靜憩雞鳴午

荒尋犬吠昏歸來向人說疑是武陵源

招丁元珍

王安石

默默不自得紛紛何所為畫墁聊取食獵較久隨時秋入江湖暗
風生草樹悲黃花一杯酒思與故人持

半山春晚即事

王安石

春風取花去酬我以清陰翳翳陂路靜交交園屋深
杖履或幽尋惟有北山鳥經過遺好音

定林

王安石

漱甘涼病齒坐曠息煩襟因脫水邊屨就敷巖上衾
但留雲對宿仍值月相尋真樂非無寄悲蟲亦好音

自白上村入北寺

王安石

雨過百泉出秋聲連眾山獨尋飛鳥外時度亂流閒
坐石偶成歇看雲相與還會須營一畝長此聽潺潺

和象之北軒書事

韓維

舍北多嘉樹垂陰及四鄰清風常滿竹好鳥不驚人
圖史無它物謳吟佚此身應容里中客一醉倒冠巾

平居

王安石

絺綌散南風平居觸事慵古今無適莫義命有違從
水鳥迎秋舫山花映夕春故鄉圖畫見垂老愧塵容

明皇

鄭獬

四海不搖草九重藏禍根十年傲堯舜一笑破乾坤
夷狄皆冠冕豺狼盡子孫潼關兵已破會憶老臣言

送趙樞寺丞宰虔化縣

陶弼

路入南雲下如何輕解攜人煙五嶺北星斗大江西
暖雪梅花樹晴雷贛石溪青衫欲無淚不奈鷓鴣啼

出嶺題石灰鋪

陶弼

馬度嚴關口生歸喜復嗟天文離卷舌人影背含沙
江勢一兩曲梅梢三四花登高休問路雲下是吾家

同宋復古遊大林寺

周敦頤

三月山方暖林花互照明路盤層頂上人在半空行水色雲含白禽聲谷應清天風拂巾袂縹緲覺身輕

冬至

邵雍

何者謂之幾天根理極微今年初盡處明日未來時此際易得意其閒難下辭人能知此意何事不能知

晚涼閒步

邵雍

得處亦多矣風前任鬢斑年過半百外天與一生閒瑩靜雲閒月分明雨後山中心無所愧對此敢開顏

重九日登石閣

邵雍

事出一時閒時過事莫閒當時深可愛過後不堪看夏去休言暑冬來始講寒人能知此理憂患自難干

悟人一言

邵雍

百慮謀猶拙一言迷自開世閒無大事天下有雄才唯恐人難得

寧憂道未恢忌心都去盡何復病塵埃

陳公虞園修禊事席上賦

程顥

盛集蘭亭舊風流洛社今坐中無俗客水曲有清音香篆來還去花枝泛復沈未須愁日莫天際是輕陰

和王正仲熙寧郊祀二十韻

劉敞

駿命膺長發鴻圖本慎徽八方星拱極四海日升暉舊典增成秩彌文示表微聖時均玉燭天統正璿璣南極迎陽復陰泉候氣歸積高常眷顧昭孝每無違羽衛來雙闕和鑿並六飛風霆齊命令龍虎會旗旂帳殿層城暮金波列宿稀嚴更虛夜鑿彫輦下彤闈廣樂千人唱升煙萬目晞眾神知受記象物競來依陟降兼明察圓方比範圍送音仍鸞鸞昇福想霏霏澤蘇羣動春陽暢堦扉慶深周揭厲感極至獻欬多士參鳴玉微生厠阜衣肅雍瞻帝武奉引近天威儒館鸚鵡舊長謠錦繡輝因知子雲賦何足頌巍巍

和鄭閔仲仙居

陳襄

我愛仙居好臨民必以誠簿書無日暇獄訟積年生子始至邑豪
折細民田土者迹驗分明予治而歸之或有年深而亡籍者亦妄
詞訟三年分戶二千凡有產而無業積年空納其租許其還主者
不可勝數

百疾求箴補千鈞待準平嗟予不如古斯道未能宏

我愛仙居好隆儒予每講書罷又令童子俾大方諸生今講藝諸生各轉相教授童子俾
升堂公暇每有童子十數人至買地興民學舍買三家之地以廣
其驅車下黨庠小學則下以觀童子三年邑未化官滿意彷徨

我愛仙居好公餘日在房憂民極反覆責已未周詳法律行隨手
詩書坐滿箱老來須向學多病喜平康

和子由初到陳州

蘇軾

舊隱三年別杉松好在吾今尚眷眷此意恐悠悠閉戶時尋夢
無人可說愁還來送別處雙淚寄南州

廣愛寺朱瑤畫

蘇軾

朱瑤唐晚輩得法尚雄深滿寺空遺迹何人識苦心長廊歎雨腳
破壁撼鐘音成壞無窮事他年復弔今

過淮

蘇軾

好在長淮水十年三往來功名真已矣歸計亦悠哉今日風憐客
平時浪作堆晚來洪澤口捍索響如雷

乘舟過賈收水閣二首

蘇軾

嫋嫋風蒲亂猗猗水荇長小舟浮鴨綠大杓瀉鵝黃得意詩酒社
終身魚稻鄉樂哉無一事何處不清涼

曳杖青苔岸繫船枯柳根德公方上冢季路獨留言已占蒲魚港
更開松菊園從茲來往數兒女自鷹門

郊祀慶成

蘇軾

帝出乘昌運天心予太平文章三代繼制作七年成大祀乾坤合
剛辰日月明泰壇朝埽地魄寶夜垂精仰御圓蒼蓋還觀海岱城
北流吞朔易南極落機槍升燎靈光答回鸞瑞霧迎需雲徧枯槁
解雨達句萌可頌非天德因箴亦下情民言知有酌帝謂本無聲
富國由崇儉斬年在好生無心斯格物克已自消兵化國安新政

孤臣反舊耕還將清廟什留與野人賡

新年二首

蘇軾

小兩暗人日春愁連上元水生挑菜渚煙濕落梅村晚市人歸盡
孤舟鶴踏翻猶堪慰寂寞漁火亂黃昏
北渚集羣鷺新年何所之盡歸喬木寺分占結巢枝生物會有役
謀身要及時何當禁畢弋看引雪衣兒

倦夜

蘇軾

欹枕倦長夜小窗猶未明孤村一犬吠殘月幾人行衰鬢久已白
旅懷空自清荒園有絡緯虛織竟何成

次韻江晦叔

蘇軾

鐘鼓江南岸歸來夢自驚浮雲世事改孤月此心明雨已傾盆落
詩仍翻水成二江爭送客水杪看橋橫

次韻公定世弼登北都東樓二首

黃庭堅

眞皇多廟勝仁祖用功深卜宅遷九鼎破胡藏萬金百年休戰士

當日縱前禽欲斷匈奴臂不如留此心

漢皇勤遠略晚節相千秋不足中原地猶思一戰收聖朝方北顧
斜日倚東樓廟算知無敵寒儒浪自愁

歲寒知松栢

黃庭堅

羣陰彫品物松栢尙桓桓老至惟心在相將到歲寒霜嚴御史府
雨立大夫官犧象溝中斷徽絃纓下殘光陰一鳥過斬伐五牛難
春日輝桃李蒼顏亦預觀

款塞來亭

黃庭堅

前朝夏州守來款塞門西聖上開皇極降書付狄鞬瓊裘瞻日月
虜面帶金犀殿陛閑干羽邊庭息鼓鞶永輸量谷馬不作觸藩羝
聲勢常相倚令聞定五溪

神宗皇帝挽詞二首

黃庭堅

文思昭日月神武用雷霆制作深垂統憂勤減夢齡孫謀開二聖
永命對三靈今代誰班馬能書汗簡青

鈞築收賢輔天人與聖能輝光唐六典度越漢中興百世神宗廟
千秋永裕陵帝鄉無馬跡空望白雲乘

次韻崔伯易席上所賦因以贈行

黃庭堅

迎新與送故渠已不勝勤民賣腰閒劔公寬柱後文諸郎投賜沐
高會惜臨分去國雖千里分憂即近君

司馬文正公挽詞二首

黃庭堅

國在多艱日人如大雅詩忠清居沒世孝友是生知加璧延諸老
縶弓撫四夷公身與宗社同作太平基
毀譽蓋棺了于今名實尊哀榮有王命終始著民言蟬冕三公府
深衣獨樂園平生兩無累憂國愛元元

范忠文公挽詞二首

黃庭堅

信道雖常爾知人乃獨亨書林身老大諫紙字欹傾鰲去三山動
人危五鼎烹保全天子聖几杖送餘生
公在昭陵日文章近赤墀空嗟伏生老不侍邇英帷去國幾三虎

聞韶待一夔誰言蓋棺了新樂鎖蛛絲

和答錢穆父詠猩毛筆

黃庭堅

愛酒醉魂在能言機事疎平生幾兩屐身後五車書物色看王會
勳勞在石渠拔毛能濟世端為謝楊朱

次韻秦少章晁適道贈答詩

黃庭堅

二子論文地陰風雪塞廬寧穿東郭履不奉子公書士固難推挽
時聞有詔除負暄真得計獻御恐成疎

和文潛舟中所題

黃庭堅

雲橫疑有路天遠欲無門信矣江山美懷哉譴逐魂長波空永記
佳句洗眇昏誰奈離愁得村醪或可尊

漢陽親舊攜酒追送聊為短句

黃庭堅

接浙報官府敢違王事程宵征江夏縣睡起漢陽城鄰里煩追送
杯盤瀉濁清祇應瘴鄉老難答故人情

次韻廖明略陪吳明府白雲亭宴集

黃庭堅

江淨明花竹山空響管絃風生學士塵雲繞令君筵百越餘生聚
三吳遠接連庖霜刀落鱸執玉酒明船葉縣飛來鳥壺公謫處天
酌多時暴謔舞短更成妍唯我孤登覽觀詩未究宣空餘五字賞
文似兩京然醫是肱三折官當歲九遷老夫看鏡罷衰白敢爭先

贈楊明叔

黃庭堅

窮奇投有北鴻鵠止邱隅我已魑魅禦君方燕雀俱道應無芥蒂
學要盡工夫莫斬獐狙杙明堂待棟桴

閑居有感

李宗易

進退荷君恩孤懷豈易論以閑銷日月何力報乾坤架上書千卷
花前酒一樽相持兩成癖此外盡忘言

江上逢晁適道

崔子方

渺渺連江雨微微到面風主人留一餉佳士得相逢會面嗟何晚
論詩許有功君家好兄弟更覺此心同

荷花

豐稷

桃杏二三月此花泥滓中人心正畏暑水面獨搖風淨剎如金湧
嘉賓照暮紅誰歌採菱曲舟在曉霞東

寄鄭介夫

畢仲游

鄭子安強否梅花萬里春如何投虎穴直欲犯龍鱗北闕今無數
南方信有人可憐妻子在年少不謀身

春日獨遊南園

楊蟠

天淨鳥飛遠路幽花自香春風吹草木野水滿池塘事去青山在
人閒白日長興來搔短髮微意久難忘

聞赦有作

張舜民

擊破填街道傳聲過水濱國嚴三歲禮恩洗萬家春舟楫親南斗
衣冠拱北辰嶺南并嶺北多少望歸人

曾子固挽詞二首

陳師道

早棄人閒事真從地下游邱原無起日江漢有東流身世從違裏
功名取次休不應須禮樂始作後程仇

精爽回長夜衣冠出廣庭勳庸留琬琰形象倚丹青道喪餘篇翰
人亡更典刑侯芭才一足白首太玄經

司馬溫公挽詞二首

陳師道

恭默思良弼詩書正百工事多違謝傅天遽奪楊公一代風流盡
三師禮教崇若無天下議惡美併成空
百姓歸周老三年待魯儒世方隨日化身已要人扶玉几雖來晚
明堂訖授圖心知死諸葛終不羨曹蜍

登城樓

陳師道

城郭春容晚因行可當遊飛來雙蛺蝶目盡一浮鷗峽嶮山將合
江平水卻流同來端興盡為且小遲留

和王子安至日

陳師道

物理有終極人情從往還陰陽消長際老疾去留閒申白徒懷惠
巢由不買山更歌吾和汝風日稍侵顏

送吳先生謁惠州蘇副使

陳師道

聞名欣識面異好有同功我亦慙吾子人誰恕此公百年雙白鬢
萬里一秋風為說任安在依然一秃翁

懷遠

陳師道

海外三年謫天南萬里行生前只為累身後更須名未得平安報
空懷故舊情斯人有如此無復涕縱橫

張芻令餘杭

孫處

經年獨窮處此去豈無營最近吾民病無嗟縣令名官卑人易信
政肅化方行更有論心處前溪水正清

種圃

張耒

儼舍亦為圃從人笑我癡自求佳草木仍插小藩籬吾事正如此
人生聊自怡霜松未及尺獨我見奇姿

近清明

張耒

斜日去不駐好風來有情江城過風雨花木近清明水樹閑照影
山禽時引聲吾年行老矣淹泊蹇何城

晨興

張耒

端居歲已晏杖履亦蕭然雲露窗前日秋明樹外天大江寒欲落
諸嶺霽逾鮮白首無聊劇昏昏只醉眠

都梁亭下

張耒

金塔青冥上孤城莽蒼中淺山寒帶水早日白吹風人事劇翻手
生涯真轉蓬高眠待春漲鮭菜伴南公

舟中曉思

張耒

樹色未啼鳥槳聲初度航客燈青映壁城角冷吹霜飄泊年來甚
羈遊情易傷年豐清潁尾吾計亦差良

南澗月夕

俞紫芝

華髮念秋晚青燈憐夜長香團菊花露寒著橘林霜月在北窗底
人行南澗旁婆婆不知去身與兩相忘

廣武山懷古

劉季孫

楚漢兵相接乾坤晝亦暝虎爭千里震龍戰四郊腥故壘從誰問

嚴祠自昔靈北風吹敗木落日任飄零

春日遊金明池

李昭玘

日有江湖思坐無車馬塵橫橋自照水啼鳥不驚人輦路晴飛絮
宮門暗鎖春多情老園吏灑地喜相親

獨步懷元中

洪朋

淨盡西山日深行城北村琅璫鳴佛屋薜荔上僧垣晴雨慰楊腹
夕風清病魂所思渺江水誰與共忘言

宿范氏水閣

洪朋

枕水鑿疏櫺雲扉夜不扃灘聲連地籟林影亂天星人靜魚頻躍
秋高露欲零何妨呼我友乘月與揚舲

石牛莊閑居

崔鷗

不識春風面知從底處來紅深桃靨破綠靜水簾開物外心常掛
人閒事不諧從今江海去無復世推排

見黃太史

高荷

萬里南溪郡黃香得賜環盛名喧海內摧翮返雲間太史資誠峻
郎官選亦慳朝廷才特起堂奧援誰扳一夢追前事羣公厄後艱
中傷皆死禍放逐罕生還別駕之戎焚僑居傍草菅想知諳鳥道
聞說異人寰楊子家元窘王維室久鰥鵬來心破碎猿叫淚浹潺
達觀終難得羈愁必易刪眾情相惻憫靈物自恬憫迴閣澄秋晚
幽窗聳夜跼蜀天何處盡巴月幾回灣墜履魂空斷遺弓涕忽潛
石門淒殿楯銅雀慘宮鬢帝統聯仁聖皇恩感豔頑網羅疏黨禁
誅蔓埽朋姦點檢金閨彥凋零玉筍班尚令宗廟器遙隔鬼門關
拊髀咨詢及含香誥命頒笑談趨赤縣吟詠落烏蠻奏記懷東觀
移文頷北山應將九遷待未補七年閑士愧千鈞弩身謀五兩綸
退藏欣望氣延仰竊窺斑昌谷詞源窄浯溪筆力孱斲輪深類扁
投斧欲隨般鵠卵真能伏龍鱗敢冀攀不嗔無紹介試遣略承顏

題折氏下城園

吳則禮

繫馬後河川可人冬景妍要看花到地付與水浮天未覺隨戎馬

端來喚酒船誰云是關塞勝事總堪傳

春日書懷

潘大臨

舟楫凌漳水風濤接蠡湖龍煤成跬步驪頰脫微軀樂土供遊戲
深文苦紮胸中雖魄磊墻外或歌呼老去嵇康懶歸來甯子愚
千鍾真臭腐十畝借膏腴春雨何曾密園花竟自都小橋藏細柳
方沼出新蒲酒熟拈巾漉經傳帶雨鋤行盤隨所有坐客幾時無
日轉槐陰暮門通鳥遷迂仰頭看哺鷄引手亦將雛撫事盆繅繭
勞生戶轉樞形骸浮大塊毛髮燎洪爐世論幾膠柱人心盡好竿
屈龍非至計射雉屈良圖借箸方隆漢推枰已滅吳從渠畫麟閣
吾白著潛夫

江上晚步

潘大臨

白鳥沒飛煙微風逆上船江從樊口轉山自武昌連日月懸終古
乾坤別逝川羅浮南斗外黔府若何邊

題呂少馮聽雨堂

李彭

碧澗寒侵屋幽雲夜度牆貪看山人坐怪聽雨鳴廊苦乏陰鏗句
聊登孺子牀非君無汲引寄傲學潛郎

春日有懷

林敏功

風高收雨急日薄過窗微梅蘂初迎臘春溪欲染衣形容今日是
遊行昔人非節物關愁緒歸鴻正北飛

宋文鑑卷第二十三

宋文鑑卷第二十四

詩

七言律詩

和御製夏日垂釣作

徐鉉

內宴應制

曹翰

豫章胡氏華林書堂

張齊賢

春日書懷

寇準

春夕偶作

趙湘

上李昉相公二首

王操

溫泉

鄭文寶

讀江總傳

鄭文寶

梅花

林逋

小園梅花

林逋

晨興

魏野

山居

丁謂

民牛多疫死

楊億

漢武

楊億

莎衣

楊朴

假中示判官張丞寺王校勘

晏殊

初秋宿直

晏殊

安昌侯

晏殊

偶成

石延年

金鄉張氏園亭

石延年

首陽

石延年

喜雨

韓琦

寄子京

宋庠

府齋歲宴寄昭文相公樞密太尉

宋庠

重展西湖

宋庠

招魯清

范雍

書王元之畫像側

歐陽修

上致政太保杜相公

歐陽修

內直對月

歐陽修

下直

歐陽修

早朝感事

歐陽修

青州書事

歐陽修

望太湖

蘇舜欽

春睡

蘇舜欽

中秋松江新橋對月和柳令之什

蘇舜欽

喜永叔安道仲儀除諫官

蔡襄

詠門

龍昌期

走筆寄夷陵歐陽永叔

謝伯初

許昌公宇書懷呈歐陽永叔韓子華王介甫

寄杭州孫資政

謝伯初

讀史

唐介

示長安君

王安石

詳定試卷

王安石

和金陵懷古

王安石

思王逢原

王安石

次韻元厚之平戎慶捷

王安石

葛溪驛

王安石

郡舍偶書

楊偕

送唐介之貶所

李師中

送唐御史

仲訥

聞富井州入相

王令

紙鳶

王令

聞南陽呂諫議誨長逝

鄭獬

恭和御製上元觀燈

王珪

和御製夏日垂釣作

徐鉉

物茂時平日正長翠華停馭睠方塘文竿乍拂圓荷動頰尾時翻

素苻香瘖賞只應從暇豫聖恩寧肯閒沉翔吞舟自是貪芳餌猶

笑成湯一面張

曹翰

內宴應制

三十年前學六韜英名嘗得預時髦會因國難披金甲不為家貧

賣寶刀臂健尙嫌弓力軟眼明猶識陣雲高庭前昨夜秋風起羞

見團花舊戰袍

張齊賢

豫章胡氏華林書堂

一百年來煙爨同衣冠江左慕家風兒孫歌舞詩書內鄉黨優游

禮讓中孝悌筠編爭紀錄門閭天語賜褒崇莫將六闕方朱氏

則家門孝友三葉 葉葉蒸蒸奉始終

春日書懷

寇準

會讀前書笑古今恥隨流俗信浮沉終期直道扶元化敢為虛名
役片心默坐野禽啼晝景閉門官柳長春陰世間事了先須退不
待霜毛漸滿簪

春夕偶作

趙湘

一夕衡門獨自開雨陰深巷少塵埃醉醒風傍池邊起坐久月從
花上來何處夜歌初欲斷四鄰春夢未知回因思此興無人共時
復孤吟步綠苔

上李昉相公二首

王操

弱冠登龍入粉闈少年清貴古來稀袖中詔草朝天去頭上宮花
侍宴歸卓筆玉堂寒漏迴捲簾池館水禽飛三台位近猶嫌遠閒
聽秋霖憶翠微

其二

朝苑優游數十春文章敵手更無人對敷旒冕如僚友下直門關

似隱淪倚檻白雲供醉望搢笏黃葉落吟身年來得意知難絕大
半門生作侍臣

溫泉

鄭文寶

潺湲如潦嶺雲陰玉石魚龍換古今只見開元無事久不知貞觀
用功深籠無解語衣無雪堆有黃沙粟有金惆悵胡雛負恩澤始
知夷甫少經心

讀江總傳

鄭文寶

行人慵過景陽宮宮畔離離禾黍風庭玉有花空怨白井蓮無步
莫愁紅吟詩功業才雖大亡國君臣道最同爭忍暮年歸故里綸
竿迴避釣魚翁

梅花

林逋

吟懷長恨負芳時為見梅花輒入詩雪後園林纔半樹水邊籬落
忽橫枝人憐紅豔多應俗天與清香似有私堪笑胡雛亦風味解
將別調角中吹

小園梅花

林逋

眾芳搖落獨暄妍，占盡東風向小園。
疎影橫斜水清淺，暗香浮動月黃昏。
霜禽欲下先偷眼，粉蝶如知合斷魂。
幸有微吟可相狎，不須檀板共金樽。

晨興

魏野

夜長乞待得晨興，耽睡僮猶喚不應。
燒藥鑪中無宿火，讀書窗下有殘燈。
臨階短髮梳和月，傍岸衰容洗帶冰。
料得巢禽翻怪訝，尋常日午起慵能。

山居

丁謂

峒口清香澈海濱，四時芬馥四時春。
山多綠桂憐同氣，谷有幽蘭讓後塵。
草解忘憂憂底事，花能含笑笑何人。
含海南有爭如彼，美飲天壤長薦芳香奉百神。

民牛多疫死

楊億

南海逆風知失性，東吳喘月不逢醫。
一元祀典古所重，九穀民天

命在斯真相柅車，寧致問族庖更刃亦焉施。
炎神癘鬼爭為虐，度虎消蝗復是誰。

漢武

楊億

蓬萊銀闕浪漫漫，弱水回風欲到難。
光照竹宮勞夜拜，露溥金掌費朝餐。
力通青海求龍種，死諱文成食馬肝。
待詔先生齒編貝，那教索米向長安。

莎衣

楊朴

軟綠柔藍著勝衣，倚甌吟釣最相宜。
兼葭影裏和煙臥，菡萏香中帶雨披。
狂脫酒家春醉後，亂堆漁舍晚晴時。
直饒紫綬金章貴，未肯輕輕博換伊。

假中示判官張寺丞王校勘

晏殊

元巳清明假未開，小園幽徑獨徘徊。
春寒不定斑斑雨，宿醉難禁灑灑杯。
無可奈何花落去，似曾相識燕歸來。
遊梁賦客多風味，莫惜青錢萬選才。

初秋宿直

晏殊

絳河星斗夜闌干，禁署沈沈閉九關。上帝冊書羣玉府，仙人宮闕巨鼇山。涼蟾影度秋陰薄，促漏聲來夜唱閑。擁鼻吟多欲愁絕，巖鍾淒斷樹烏還。

安昌侯

晏殊

蓮勺移家近七遷，魯儒章句世相傳。關中沃壤通涇渭，堂上繁聲逐管絃。身服儒衣同蔡義，日將卮酒對彭宣。高墳丈五陽陵外，千古朱雲氣凜然。

偶成

石延年

力振前文覺道孤，恥同流輩論榮枯。動非仁義何如靜，得見機關不似無。孔孟也宜輕管晏，皋夔未必失唐虞。侯王重問吾何有，且自低心混世儒。

金鄉張氏園亭

石延年

亭館連城敵謝家，四時園色鬪明霞。牕迎西渭封侯竹，地接東陵

隱士瓜樂意相關，禽對語生香不斷。樹交花縱遊會約，無留事醉待參橫。月落斜

首陽

夷齊在孟津，諫伐紂而死於首陽。其山在蒲坂，乃舜都也。豈非二子之意，何古之所不思哉。

石延年

遼國同來訪聖謨，適觀爭國誓師徒。恥生湯武干戈日，寧死唐虞揖讓區。大義充身安是餓，清竄有所未應無。始終天地亡前後，名骨雖雙此行孤。

喜雨

韓琦

何假噴雷擊怒桴，默然嘉澤浹民區。經時亢隔羣心駭，數月焦熬一陣蘇。已發禾苗安在握，再生莊紂不虞枯。須臾慰滿三農望，卻斂神功寂似無。

寄子京

宋庠

八年三郡駕朱輪，更忝鴻樞對國均。老去師丹多忘事，少來之武不如人。車中顧馬空能數，海上逢鷗想見親。唯有弟兄歸隱志，共

將耕鑿報堯仁

府齋歲晏節物感人輒成拙詩上寄昭文相公樞密太尉

宋庠

處世何常盡值才虛名高位自驚猜千重浪裏隨流出百尺竿頭
試險回衰鬢不徒欺曉雪孤心兼欲伴寒灰嵩陽穎曲風煙接已
仗歸雲作隱媒

重展西湖

宋庠

綠鴨東陂已可憐更因雲竇注西田鑿開魚鳥忘情地展盡江湖
極目天向夕舊灘都浸月過寒新樹便留煙使君直欲稱漁叟願
賜閑州不計年

書王元之畫像側

歐陽修

偶然來繼前賢迹信矣皆如昔日言諸縣豐登少公事一家飽暖
荷君恩想公風采常在顧我文章不足論名姓已光青史上壁
閒容貌任塵昏

公版滁州謝上表云諸縣豐登苦無公事一家飽暖共荷君恩

上致政太保杜相公

歐陽修

儉節清名世絕倫坐令風俗可還淳貌先年老因憂國事與心違
始乞身四海儀刑瞻舊德一罇談笑作閑人鈴齋幸得親師席東
向時容問治民

內直對月

歐陽修

禁署沉沉玉漏傳月華雲表溢金盤纖埃不隔光初滿萬物無聲
夜向闌蓮燭燒殘愁夢斷蕙鑪薰歇覺衣單水精宮鎖黃金闕故
比人閒分外寒

下直

歐陽修

宮柳街槐綠未齊春雲不解宿雲低輕寒漠漠侵駝褐小雨班班
作燕泥報國無功嗟已老歸田有約一何稽終當自駕柴車去獨
結茅廬潁水西

早朝感事

歐陽修

疎星半落曉光微殘月蒼龍闕角西玉勒爭門隨仗入牙牌當殿

報班齊羽儀雖接鴛兼鷺野性終存鹿與麋笑報汝陰常處士十
年騎馬聽朝雞

青州書事

歐陽修

年豐千里無夜警吏退一室焚清香青春固非老者事白日自爲
閑人長厚祿豈惟慙飽食俸餘仍是買輕裝君恩天地不違物歸
去行歌頽水傍

望太湖

蘇舜欽

杳杳波濤閱古今四無邊際莫知深潤通曉月爲清露氣入霜天
作暝陰笠澤鱸肥人鱸玉洞庭柑熟客分金風煙觸目相招引聊
爲停橈一楚吟

春睡

蘇舜欽

別院簾昏掩竹扉朝醒未解接春暉身如蟬蛻一榻上夢似楊花
千里飛塔爾暫能離世網陶然直欲見天機此中有德堪爲頌絕
勝人間較是非

中秋松江新橋對月和柳令之什

蘇舜欽

月晃長江上下同畫橋橫截冷光中雲頭豔豔開金餅水面沉沉
臥彩虹佛氏解爲銀色界仙家多住玉華宮地雄景勝言不盡但
欲追隨乘曉風

喜永叔安道仲儀除諫官

蔡襄

御筆新除三諫官喧然朝野盡相懽昔時流落丹心在自古忠賢
得路難好竭謀猷居帝右直須風采動朝端世閒萬事皆塵土留
取功名久遠看

詠門

龍昌期

樞動本爲榮辱主長因外戶細推尋乾坤出入無窮象夷狄關防
有限心揜到善人非遠大開當古道自高深九成載舉簫韶奏穆
穆無凶合在今

走筆寄夷陵歐陽永叔

謝伯初

舟行無險似瞿塘滿峽猿聲斷旅腸萬里更堪人謫宦經年應合

鬢成霜長官衫色江波綠學士文華蜀錦張去似長沙非黜辱比
於連郡亦遐荒韓退之以言事可能作賦嘲巫渚好為投文弔耒
陽杜子美下未下國難留金馬客新詩傳與竹枝娘才如夢得多
為累情甚安仁久悼亡絕境化成儒雅俗遠民爭識校讎郎典詞
懸待修青史諫草當來露早囊不用臨流羨漁者便將纓足濯滄
浪

許昌公宇書懷呈歐陽永叔韓子華王介甫

謝伯初

十年趨競浪求榮因得閑曹減宦情亂種黃花看野景旋移高竹
聽秋聲驅馳賤事猶干祿約勒清狂為近名早晚持竿釣鱸鱖雙
溪煙雨一舟橫

寄杭州孫資政

唐介

何人富貴不圖安大抵為臣節欲完手執樞機謀國易心存忠義
入時難臨風未覺龍媒老衝斗誰知劒氣寒天子聖神思舊德肯

教旌馭久盤桓

讀史

王安石

自古功名亦苦辛行藏終欲付何人當時黜闇猶承誤末俗紛紜
更亂真糟粕所傳非粹美丹青難寫是精神區區豈盡高賢意獨
守千秋紙上塵

示長安君

王安石

少年離別意非輕老去相逢亦愴情草草杯盤供笑語昏昏燈火
語平生自憐湖海三年隔又作塵沙萬里行欲問後期何日是寄
書應見鴈南征

和金陵懷古

王安石

懷鄉訪古事悠悠獨上江城滿目秋一鳥帶煙來別渚數帆和雨
下歸舟蕭蕭暮吹驚紅葉慘慘寒雲壓舊樓故國淒涼誰與問人
心無復更風流

詳定試卷

王安石

童子常誇作賦工暮年羞悔有揚雄當時賜帛倡優等今日論才
將相中細甚客卿因筆墨卑於爾雅注魚蟲漢家故事真當改新
詠知君勝弱翁

思王逢原

王安石

蓬蒿今日想紛披冢上秋風又一吹妙質不為平世得微言唯有
故人知廬山南墮當書案湓水東來入酒卮陳迹可憐隨手盡欲
歡無復似當時

次韻元厚之平戎慶捷

王安石

朝廷今日四夷功先以招懷後殪戎胡地馬牛歸隴底漢人煙火
起湟中投戈更講諸儒藝免胄爭趨上將風文武佐時慚吉甫宣
王征伐自膚公

葛溪驛

王安石

缺月昏昏漏未央一燈明滅照秋床病身最覺風霜早歸夢不知
山水長坐感歲時歌慷慨起看天地色淒涼鳴蟬更亂行人耳正

抱疎桐葉半黃

郡舍偶書

楊偕

偃息鈴齋度歲華著書人盡笑聱牙斯文自信驚天地吾道誰知
繫國家獨愛杉篁寒不變更憐江海闊無涯因思朝市爭名地何
似優游刺史衙

送唐介之貶所

李師中

直誠自許時不與孤立敢言人所難去路一身輕似葉高名千古
重於山並游英俊顏何厚已死姦雄骨尚寒天意若為宗社計肯
教夫子不生還

送唐御史

仲訥

力犯雷霆眾共危遠投魑魅獨為宜忠州學業真無負高廟神靈
固有知自倚聖明容直道未甘憔悴死荒陲滿朝卿相多公議莫
把文章作楚詞

聞富并州入相

王令

元首賡歌樂股肱四方雖遠喜聲盈忠賢不死天心在輔弼終歸
聖慮精中國自今應更重本朝前日可嗟輕要須待見成堯舜未
敢輕浮作頌聲

紙鳶

王令

誰作輕鳶壯遠觀似嫌飛鳥未多端纔乘一線憑風去便有愚兒
仰面看未必青霄因可到偶能終日遂為安扶搖不起滄溟遠笑
殺鵬搏似爾難

聞南陽呂諫議誨長逝

鄭獬

子文三仕去何頻一臥南陽竟沒身明主自應容直道皇天何事
殺忠臣柱天力屈空留草貫日心存不化塵黃壤不知人世事為
君慟哭楚江濱

恭和御製上元觀燈

王珪

雪消華月滿仙臺萬燭當樓寶扇開雙鳳雲中扶輦下六鰲海上
駕山來鎬宮春酒霑周燕汾水秋風陋漢材一曲昇平人共樂唐

聖代昇平樂曲 君王又進紫霞杯

宋文鑑卷第二十四

宋文鑑卷第二十五

詩

七言律詩

閑居吟

仁者

清風短吟

閑行吟

洛下園池

答人語名教

何事吟

觀三皇

觀五帝

觀三王

觀五伯

邵邵邵邵邵邵邵邵邵邵

雍雍雍雍雍雍雍雍雍雍

觀七國
觀嬴秦
觀兩漢
觀三國
觀西晉
觀十六國
觀南北朝
觀隋
觀有唐
觀五代
觀盛化
問鼎
安樂窩
自詠

邵邵邵邵邵邵邵邵邵邵邵邵邵邵邵邵邵
雍雍雍雍雍雍雍雍雍雍雍雍雍雍雍雍雍

首尾吟

蒼蒼吟寄李審言

林下

安樂四吟

自和打乖吟

題華下無相院西溪

寄李朝請

郊行即事

秋日偶成

出潁口初見淮山

新城道中

和王旂

次韻李修孺留別

直玉堂詔賜官燭法酒

邵邵邵邵邵邵邵邵邵邵邵
蘇蘇蘇蘇蘇蘇蘇蘇蘇蘇蘇
軾軾軾軾軾軾軾軾軾軾軾

和劉景文見贈

王文玉挽詞

雪後書北臺壁二首

往歧亭

姪安節遠來夜坐

祭常山回小獵

次韻穆父尙書侍祠郊丘

樂全先生生日以鐵拄杖爲壽

新釀桂酒

連雨江漲二首

枕椰杖寄張文潛

夜坐達曉寄子由

六月二十日夜渡海

潤州甘露寺

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

沈括

感秋扇

寄黃幾復

寄上叔父夷仲

詠雪

新喻道中寄元明

壺中九華

郊丘從駕

喜聞中丞包公稱職有書

陪潤州裴如晦學士遊金山回作

示諸君

次韻寇秀才寄下邳家兄

次韻春懷

東山謁外大父墓

寄泰州曾侍郎

蘇轍

黃庭堅

黃庭堅

黃庭堅

黃庭堅

黃庭堅

彭汝礪

楊蟠

楊蟠

徐積

陳師道

陳師道

陳師道

陳師道

夏日二首

元日

聞趙正夫遷門下

旅中諭懷

寄蘇內翰

望舊廬有感

題牛隱堂

晚登秋屏閣示杜氏兄弟

答王立之惠書

望西山懷駒父

簡田升之時升之赴金陵

病後登快哉亭

閑居吟

閑居須是洛中居天下閑居皆莫如文物四方賢俊地山川千古

張耒

任伯雨

鄒浩

俞紫芝

劉季孫

葉濤

劉跂

洪朋

潘大臨

李彭

吳則禮

賀鑄

邵雍

帝王都絕奇花畔持芳醕最軟草間移小車只有堯夫負親舊交親元不負堯夫

仁者

邵雍

仁者難逢思有常平居切勿恃何妨爭先路徑機關惡近後語言滋味長爽口物多須作病快心事過必為傷與其病後能求藥不若病前能自防

清風短吟

邵雍

清風興味未全衰豈謂天心便棄遺長具齊莊緣讀易每慙疎散為吟詩人間好景皆輸眼世上閑愁不到眉生長太平無事日又還身老太平時

閑行吟

邵雍

長憶當年掃弊廬未嘗三徑草荒蕪欲為天下屠龍手肯讀人間非聖書否泰悟來知進退乾坤見了識親疎自從會得環中意閑氣胷中一點無

洛下園池

邵雍

洛下園池不閉門洞天休用別尋春縱游只卻輸閑客遍入何嘗問主人更小亭欄花自好儘荒臺榭景纔真虛名誤了無涯事未必虛名總到身

答人語名教

邵雍

開闢而來世教敷其間誰者號真儒修身有道名先覺何代無人達奧區煥若丹青經史義明如日月聖人途鯁生涵泳雖云久天下英才敢厚誣

何事吟

邵雍

何事教人用意深出塵些子索沉吟施為欲似千鈞弩磨厲當如百鍊金釣水誤持生殺柄著碁閑動戰爭心一盃美酒聊康濟林下時時或自斟

觀三皇

邵雍

許大乾坤自我宣乾坤之外更何言初分大道非常道纔有先天

未後天作法極微難著蹟收功最久不知年若教世上論勳業料得更無人在前

觀五帝

邵雍

進退肯將天下讓著何言語狀雍容衣裳垂處威儀盛玉帛修時意思恭物物盡能循至理人人自願立殊功當時何故得如此只被聲明類日中

觀三王

邵雍

一片中原萬里餘殆非孱德所宜居夏商正朔猶能布湯武干戈未便驅澤火有名方受革水天無應不成需請觀仁義為心者肯作人間淺丈夫

觀五伯

邵雍

刻意尊名名愈虧人人奔命不勝疲生靈劔戟林中活公道貨財心裏歸雖則餼羊能愛禮奈何鳴鳳未來儀東周五百餘年內歎息惟聞一仲尼

觀七國

邵雍

當其末路尚縱橫仁義之言固不聽肯謂破齊存卽墨能勝坑趙
盡長平清晨見鬼未爲怪白日殺人奚足驚加以蘇張掉三寸扼
喉其勢不俱生

觀羸秦

邵雍

轟轟七國正爭籌利害相磨未便休比至一雄心底定其如四海
血橫流三千賓客方成夢百二山河又變秋謾說罷侯能置守趙
高元不是封侯

觀兩漢

邵雍

秦破山河舊戰場豈期民復見耕桑九千來里開封域四百餘年
號帝王剝喪旣而遭莽卓經營殊不念高光當時文物如斯盛城
復何由更有隍

觀三國

邵雍

桓桓鼎峙震雷音絕唱高蹤沒處尋簫鼓一方情未暢弓刀萬里

力難任論兵很石蜜無意飲馬黃河徒有心雖曰天時亦人事誰
知慮外失良金

觀西晉

邵雍

承平未必便無憂安若忘危非善謀題品人才憑雅誚雌黃人事
用風流有刀難剖公閭腹無木可梟元海頭禍在夕陽亭一句上
東門嘯浪悠悠

觀十六國

邵雍

溥天之下號寰區大禹曾經治水餘衣到弊時多蟣虱瓜當爛後
足蟲蛆龍章本不查狂寇象魏何嘗薦亂胡尼父有言堪味處當
時欠一管夷吾

觀南北朝

邵雍

方其天下分南北聘使何當絕往還偏霸尙存前典憲小康猶帶
舊腥羶洛陽雅望稱崔浩江表奇才服謝安二百四年能並轡謾
將夷虜互爲言

觀隋

邵雍

始謀當日已非臧又更相承或自戕螻蟻人民貪土地泥沙金帛
悅姬姜征遼意思糜荒服泛汴情懷厭未央三十六年都掃地不
然天下未歸唐

觀有唐

邵雍

天生神武奠中央不爾羣兇未易攘貞觀若無風凜凜開元安得
氣揚揚凭高始見山河壯入夏方知日月長三百年閒能混一事
雖成往道彌光

觀五代

邵雍

自從唐季墜皇綱天下生靈被擾攘社稷安危懸卒伍朝廷輕重
繫藩方深冬寒木固不脫未旦小星猶有光五十三年更五姓始
知除掃待真王

觀盛化

邵雍

紛紛五代亂離閒一旦雲開復見天草木百年新雨露車書萬里

舊山川尋常巷陌猶簪紱取次園林亦管絃人老太平春未老鸞
花無害日高眠

吾曹養拙賴明時為幸居多寧不知天下英才中遁跡人間好景
處開眉生來只慣見豐稔老去未嘗經亂離五事歷將前代舉帝
堯而下更無之一事革命之日市不易肆二事克服天下在即位
年無腹心之患也

問鼎

邵雍

請將調鼎問於君調鼎工夫敢與聞只有鹽梅難盡善豈無薑桂
助為辛和羹必欲須求美眾口如何更得均切勿輕言天下事伊
周殊不是庸人

安樂窩

邵雍

安樂窩中三月期老來纔會惜芳菲自知一賞有分付誰讓萬金
無子遺美酒飲教微醉後好花看到半開時這般意思難名狀只
恐人間都未知

自詠

邵雍

老去無成齒髮衰年將七十待何為居常無病不服藥間或有懷
時作詩引水更憐魚並至折花仍喜蝶相隨平生積學都無效只
得胷中惡坦夷

首尾吟

邵雍

堯夫非是愛吟詩為見聖賢興有時日月星辰堯則了江河淮濟
禹平之皇王帝霸經喪貶雪月風花未品題豈謂古人無闕典堯
夫非是愛吟詩
堯夫非是愛吟詩詩是堯夫處困時事體極時觀道妙人情盡處
看天機孝慈親和未必見松柏歲寒然後知匪石未聞心可轉堯
夫非是愛吟詩
堯夫非是愛吟詩詩是堯夫自試時事體待諳然後信人情非久
莫能知同霑雨露蓬蒿質獨出雪霜松柏姿見慣不如身歷過堯
夫非是愛吟詩

堯夫非是愛吟詩詩是閑觀蔬圃時暖地春初纔蓊鬱宿根秋末
卻披離萼葱蘢薤青遮隴蘋芋薑蕞綠滿畦時到皆能弄精彩堯
夫非是愛吟詩

堯夫非是愛吟詩詩是堯夫不強為事到強為須涉跡人能知止
是先機面前自有好田地天下豈無平路歧省力事多人不做堯
夫非是愛吟詩

堯夫非是愛吟詩詩是堯夫重惜時西晉浮誇時可歎南梁崇尙
事堪悲仲尼豈欲輕辭魯孟子何嘗便去齊儀鳳不來人老去堯
夫非是愛吟詩

堯夫非是愛吟詩詩是精神未耗時水竹清閑都占了鸞花富貴
又兼之梧桐月向懷中照楊柳風來面上吹彼有許多閑捧擁堯
夫非是愛吟詩

蒼蒼吟寄李審言

邵雍

一般顏色正蒼蒼今古人曾望斷腸日往月來無少異陽舒陰慘

不相妨迅雷震後山川裂甘露零時草木香幽暗巖崖生鬼魅清
平郊野見鸞鳳千花爛為三春雨萬木凋因一夜霜此意分明難
理會直須賢者入猜詳

林下

邵雍

老年軀體素温存安樂窩中別有春萬事去心閑偃仰四支由我
任舒伸庭花盛處涼鋪簟簷雪飛時軟布衲誰道山翁拙於用也
能康濟自家身

安樂窩吟

邵雍

詩

安樂窩中詩一編自詠自怡然陶鎔水石閑勦業銓擇風花
靜事權意去乍乘千里馬興來初上九重天快時更改三兩字醉
後吟哦六七篇直恐心通雲外月又疑身是洞中仙銀河洶湧
晴浪玉樹查牙生紫煙萬物有情皆可狀百骸無病不能蠲命題
濫被神相助得句繆為人所傳肯讓貴家常奏樂寧慙富室賸收

錢若條此過知何限因甚臺官獨未言

書

安樂窩中一部書號云皇極意何如春秋禮樂能遺則父子君臣
可廢乎浩浩義軒開闢後巍巍堯舜協和初炎炎湯武干戈外洵
洵桓文弓劍餘日月星辰高照耀皇王帝霸大鋪舒幾千百主出
規制數億萬年成楷模治久便憂強跋扈患深仍念惡驅除才堪
命世有時有智可濟時無世無既往盡歸閑指點未來須俟別支
梧不知造化誰為主生得幾多奇丈夫

香

安樂窩中一炷香凌晨焚意豈尋常禍如許免人須諂福若待求
天可量且異緇黃微廟貌又殊兒女裋衣裳中孚起信寧煩禱無
妄生災未易禳虛室清明都是白靈臺瑩靜別生光觀風禦寇心
方醉對境顏淵坐正忘赤水有珠涵造化泥丸無物隔青蒼生為
男子仍身健時遇昌辰更歲穰日月照臨光自大君臣庇蔭效何

長非圖聞道至於此金玉誰家不滿堂

酒

安樂窩中酒一罇非惟養氣又頤真頻頻到口微成醉拍拍滿懷
都是春何異君臣初際會又同天地乍緼醞酣情味難名狀醞
釀功夫莫指陳斟有淺深存燮理飲無多少寄經綸鳳凰樓下道
遙客郊廓城中自在人高閣望時花似錦小車行處草如茵卷舒
萬古興亡手出入千重雲水身雨後靜觀山意思風前閑看月精
神這般事體權衡別振古英豪恐未聞

自和打乖吟

邵雍

安樂窩中好打乖自知元沒出人才老年多病不服藥少日壯心
都未灰庭草剷除終未盡檻花擡舉尙難開輕風吹動半醺酒此
樂真從天外來

題華下無相院西溪

張先

積水涵虛上下清幾家門靜岸痕平浮萍破處見山影小艇歸時

聞草聲入郭僧尋塵裏去過橋人似鑑中行已憑暫雨添秋色莫
放修蘆礙目生

寄李朝請

范純仁

仕逾三黜信多艱名節常憂不自完幸賴聖明寬罪戾敢辭閑僻
儘盤桓孟生墜甌何能顧貢氏塵冠豈復彈俸入雖貧家世事釜
魚從此已稱丹

郊行卽事

程顥

芳原綠野恣行時春入遙山碧四圍興逐亂紅穿柳巷困臨流水
坐苔磯莫辭盞酒十分醉只恐風花一片飛況是清明好天氣不
妨游衍莫忘歸

秋日偶成

程顥

閑來無事不從容睡覺東牕日已紅萬物靜觀皆自得四時佳興
與人同道通天地有形外思入雲煙變態中富貴不淫貧賤樂男
兒到此是英雄

出穎口初見淮山

蘇軾

我行日夜向江海楓葉蘆花秋興長平淮忽迷天遠近青山久與船低昂壽州已見白石塔短棹未轉黃茅岡波平風軟望不到故人久立煙蒼茫

新城道中

蘇軾

東風知我欲山行吹斷簷間積雨聲嶺上晴雲披絮帽樹頭初日掛銅鈺野桃含笑竹籬短溪柳自搖沙水清西崦人家應最樂煮芹燒筍餉春耕

和王旂

蘇軾

異時長怪謫仙人舌有風雷筆有神聞道騎鯨游汗漫憶嘗捫蝨話悲辛氣吞餘子無全目詩到諸郎向絕倫白髮故交空掩卷淚河東注問蒼旻

次韻李修孺留別

蘇軾

十年流落敢言歸魚鳥江湖只自知豈意青天掃雲霧盡呼黃髮

寄安危風流吾子真前輩人物他年記一時我欲折繻留此老緇衣誰作好賢詩

卧病逾月請郡不許復直玉堂十一月一日鎖院是日苦

寒詔賜官燭法酒書呈同院

蘇軾

微霰疎疎點玉堂詞頭夜下攬衣忙分光御燭星辰爛拜賜宮壺雨露香醉眼有花書字大老人無睡漏聲長何時卻逐桑榆暖社酒寒燈樂未央

和劉景文見贈

蘇軾

元龍本志陋曹吳意氣崢嶸老不除失路今為噲等伍作詩猶似建安初西來為我風鰲面獨臥無人雪縞廬留子非為十日飲要令安世誦亡書

王文玉挽詞

蘇軾

才名誰似廣文寒月斧雲斤琢肺肝玄晏一生都臥病子雲三世不遷官幽蘭空覺香風在宿草何曾淚葉乾猶喜諸郎有曹志文

章還復富波瀾

雪後書北臺壁二首

蘇軾

黃昏猶作雨纖纖夜靜無風勢轉嚴但覺衾裯如潑水不知庭院已堆鹽五更曉色來書幌半月寒聲落畫簷試掃北臺看馬耳未隨埋沒有雙尖

城頭初日始翻鴉陌上晴泥已沒車東合玉樓寒起粟光搖銀海眩生花遺蝗入地應千尺宿麥連雲有幾家老病自嗟詩力退空吟冰柱憶劉叉

往岐亭郡人潘古郭三人送余於女王城東禪莊院

蘇軾

十日春寒不出門不知江柳已搖村稍聞泱泱流水谷盡放青青沒燒痕數畝荒園留我住半餅濁酒待君溫去年今日關山路細雨梅花正斷魂

姪安節遠來夜坐

蘇軾

南來不覺歲崢嶸坐撥寒灰聽雨聲遮眼文書元不讀伴人燈火亦多情嗟予潦倒無歸日今汝蹉跎已半生免使韓公悲世事白頭還對短燈檠

祭常山回小獵

蘇軾

青蓋前頭點阜旗黃茅岡下出長圍弄風驕馬跑空立趁兔蒼鷹掠地飛回望白雲生翠巘歸來紅葉滿征衣聖朝若用西涼簿白羽猶能効一揮

次韻穆父尚書侍祠郊丘瞻望天光退而相慶引滿醉吟

蘇軾

千章杞梓蔭雲天樛散誰收老鄭虔喜氣到君浮白裏豐年及我掛冠前令嚴鍾鼓三更月野宿貔貅萬竈煙太息何人知帝力歸來金帛看駢肩

樂全先生生日以鐵拄杖為壽

蘇軾

二年相伴影隨身踏遍江湖草木春槌石舊痕猶作眼閉門高節

欲生鱗畏途自衛真無敵捷徑爭先卻累人遠寄知公不嫌重筆
端猶自斡千鈞

新釀桂酒

蘇軾

擣香篩辣入餅盆盎盎春溪帶雨渾收拾小山藏社甕招呼明月
到芳尊酒材已遣門生致菜把仍叨地主恩爛煮葵羹斟桂醕風
流可惜在蠻村

連雨江漲二首

蘇軾

越井岡頭雲出山牂柯江上水如天牀牀避漏幽人屋浦浦移家
艇子船龍卷魚鰕并雨落人隨雞犬上牆眠祗應樓下平階水長
記先生過嶺年
急雨蕭蕭作晚涼臥聞榕葉響長廊微明燈火耿殘夢半溼簾帷
浥舊香高浪隱牀吹甕盎閣風驚樹擺琳琅先生不出晴無用留
向空階滴夜長

枕榔杖寄張文潛時初聞黃魯直遷黔南范滂父九疑也

蘇軾

睡起風清酒在亡身隨殘夢雨茫茫江邊曳杖枕榔瘦林下尋苗
蕪撥香獨步儻逢响嘍令遠來莫恨曲江張遙知魯國真男子獨
憶平生盛孝章

夜坐達曉寄子由

蘇軾

燈燼不挑垂暗藥爐香重撥尙餘薰清風欲發鴉翻樹缺月初升
犬吠雲閉眼此心新活計隨身孤影舊知聞雷州別駕應危坐跨
海幽光與子分

六月二十日夜渡海

蘇軾

參橫斗轉欲三更苦雨終風也解晴雲散月明誰點綴天容海色
本澄清空餘魯叟乘桴意粗識軒轅奏樂聲九死南荒吾不恨茲
游奇絕冠平生

潤州甘露寺

沈括

丞相高齋半草萊舊時風月滿亭臺地從日月生時見眼到江山

盡處回三國是非春夢斷六朝城闕野花開心隨潮水漫漫去流
徧煙村半日來

感秋扇

蘇轍

團扇經秋似敗荷丹青髣髴舊松蘿一時用捨非吾事舉世炎涼
奈爾何漢代誰令收汲黯趙人猶復用廉頗心知懷袖非安處重
見秋風愧恨多

寄黃幾復

黃庭堅

我居北海君南海寄鴈傳書謝不能桃李春風一杯酒江湖夜雨
十年燈持家但有四立壁治病不蘄三折肱想得讀書頭已白隔
溪猿哭瘴煙藤

寄上叔父夷仲

黃庭堅

艱難聞道有歸音部曲霜行壁月沉春王正月調玉燭使星萬里
朝天心頗令山海藏國用乃見縣官恤民深經心隴蜀封疆守必
有人材備訪尋

詠雪

黃庭堅

春寒晴碧來飛雪忽憶江清水見沙夜聽疎疎還密密曉看整整
復斜斜風回共作婆娑舞天巧能開頃刻花政使盡情寒至骨不
妨桃李用年華

新喻道中寄元明用觴字韻

黃庭堅

中年畏病不舉酒孤負東來數百觴喚客煎茶山店遠看人秧稻
午風涼但知家裏俱無恙不用書來細作行一百八盤攜手上至
今猶夢遠羊腸

壺中九華

黃庭堅

湖口人李正臣蓄異石九峰東坡先生名曰壺中九華并爲作詩
後八年自海外歸過湖口石已爲好事者所取乃和前篇以爲笑
實建中靖國元年四月十六日明年當崇寧之元五月二十日庭
堅繫舟湖口李正臣持此詩來石旣不可復見東坡亦下世矣感
歎不足因次前韻

有人夜半持山去頓覺浮嵐暝翠空試問安排華屋處何如零落
亂雲中能迴趙璧人安在已入南柯夢不通賴有霜鍾難席卷袖
往來聽響玲瓏

郊丘從駕

彭汝礪

今歲郊丘上始躬宿齋初出未央宮百年禮樂星辰爛萬國衣冠
錦繡中精意與天相應接人心如水自流通聖時好作休成記今
日誰爲太史公

喜聞中丞包公稱職有書

楊蟠

薛宣執法動朝廷丙魏如今亦有聲公道未亡猶可立世人慣
卻須驚幅員潤澤嘉謀進臺閣風流故事明時論已兼言責重莫
教天下笑虛名

陪潤州裴如晦學士游金山回作

楊蟠

世上蓬萊第幾洲長雲漠漠鳥飛愁海山亂點當軒出江水中分
繞檻流天遠樓臺橫北固夜深燈火見揚州回船卻望金陵月獨

倚牙旗坐浪頭

示諸君

徐積

古俗今時不用分只將虛實判澆淳養心有要先除僞入德無難
只用真此道若從爲得路他歧如往是迷津我曹好尙雖迂闊最
愛山夫其野人

次韻寇秀才寄下邳家兄

陳師道

少共千憂老一官中閒毀譽兩茫然去留有命真如此俯仰從人
卻未然故著江山供極目正將強健入新年驚逢小杜風流勝信
有衣冠不乏賢

次韻春懷

陳師道

老形已具臂膝痛春事無多櫻筍來敗絮不溫生蟣蝨大杯覆酒
著塵埃衰年此日乃爲客舊國當時只廢臺河嶺尙堪供極目少
年爲句未須哀

東山謁外大父墓

陳師道

土山宛轉屈蒼龍下有槃槃蓋世翁萬木刺天元自直叢篁侵道
更須東百年富貴今誰見一代功名託至公少日拊頭期類我莫
年垂淚向西風

寄泰州曾侍郎

陳師道

八年門第故違離千里河山費夢思淮海風濤真有道麒麟圖畫
豈無時今朝有客傳河尹是處逢人說項斯三徑未成心已具世
閒惟有白鷗知

夏日二首

張耒

長夏村墟風日清簷牙燕雀已生成蝶衣曬粉花枝午蛛網添絲
屋角晴落落疎簾邀月影嘈嘈虛枕納溪聲久捩兩鬢如霜雪直
欲樵漁過此生
棗徑瓜畦經雨涼白衫烏帽野人裝幽花避日房房斂翠樹含風
葉葉涼養拙久拚藏姓字致身安事巧文章漢庭卿相皆豪傑不
遇何妨白髮郎

元日

任伯雨

憶昔東班賀紫宸和風佳氣淨無塵龍墀初下觚稜日雉扇齊開
玉座春接武九霄曾近侍投荒三載作流人窮通忤合雖天理俯
仰尋思不爲身

聞趙正夫遷門下

鄒浩

促膝論心十二年有時忠憤淚潸然不聞一事拳拳救但見三臺
每每遷天地豈容將計免國家能報乃身全它時會有相逢日解
說何由復自賢

旅中諭懷

俞紫芝

白浪紅塵二十春就中奔走費光陰有時俗事不稱意無限好山
都上心一面琴爲方外友數篇詩當橐中金會須將爾同歸去家
在碧溪煙樹深

寄蘇內翰

劉季孫

倦壓鰲頭請左符笑尋頰尾爲西湖二三賢守去非遠六一清風

今不孤四海共知霜鬢滿重陽會插菊花無聚星堂上誰先到欲
傍金罇倒玉壺

望舊廬有感

葉濤

重來舊屋誰為主江令蕭條歎獨存已愧問人纔識路更悲無柳
可知門舟車到處成家宅歲月惟驚長子孫孤客濫巾非得已故
交零落與誰論

江令尋宅詩云見桐
蕭識井看柳尚知門

題半隱堂

劉跂

一堂圖籍自陶冶三逕蕭蘭俱歲華定非平恩許侯宅會是仲長
公理家端居雅不煩屏當佳設頗嘗成咄嗟唯我身閑數來往微
絃一泛卽生涯

晚登秋屏閣示杜氏兄弟

洪朋

病人湯熨暫時停漫向秋屏臺上行白日忽隨飛鳥去青山斷處
落霞明林間嘒嘒寒蟬急江上悠悠煙艇橫富貴功名付公等嗟
予老矣負平生

答王立之惠書

潘大臨

歸自江南卽定居謾勞親友問何如剛腸肯爲藜羹轉病骨聊憑
竹杖扶南圃土腴千樹橘東湖春水百金魚明年生計應堪說待
倩君侯買異書

望西山懷駒父

李彭

去歲湖湘賦凜秋聞君江國大刀頭百年會面知幾遇十事欲言
還九休照眼遙岑落懷袖過肩拄杖立汀洲莫言青山淡吾慮誰
料卻能生許愁

簡田升之時升之赴金陵

吳則禮

建業風流端可憐石城江色曉鮮烏窺漢節梅花底雨溼梅樓
春水邊霜髮讎書有東觀錦囊覓句屬南天枯腸不飽大官肉我
種芋魁今年

病後登快哉亭

賀鑄

經雨清蟬得意鳴紅塵開處見歸程病來把酒不知厭夢後倚樓

宋文鑑卷第二十五
無限情鴉帶殘枝投古刹草將野色入荒城故園又負黃華約但
覺秋風鬢上生

宋文鑑卷第二十五

五